



七十二峰足徵集卷五十三

武峰吳定璋友篁菟錄
螺峰王世岐聲壇編訂

吳 暘

暘字麗中號南谷馬蹟張青灣人登萬曆丁未進士初授理評平反活九人遷戶部主事督餉天津歷負外郎擢知河南府時福藩以帝愛子僕御放縱吏不得問暘持已廉潔守正不阿輒引義規諷王王戒左右歛輯民賴以安陞浙江副使尋陞廣

東叅政香山澳者倭奴貿易處也詎香山縣治二
十里倭奴萬指屯聚其中奸民甚之築城造炮臺
隱有不軌志巡撫何士晉議弭之以屬賜賜嚴緝
奸宄杜交通召其渠魁諭以朝廷威德咸俯首聽
命毀其城夷其臺事竣會何公以事去任其績弗
獲上聞尋擢四川副使陞江西右藩轉福建左藩
時海內多事征調旁午賜竭蹶支應無匱乏虞庚
午入覲召具數對稱旨仍命回閩中途病卒閩撫
按敘其勦海寇李魁奇鍾斌功追贈太僕卿

嚴陵釣臺

把釣臨清流臺在青山上先生高隱心千崖競相
向嶙峋百尺基竟敵雲臺壯古木叢高柯白雲出
孤嶂臨眺憶當年芳踪一何曠天子稱故人志豈
慕卿相盛世有烟霞客星自高尚天地一綸竿骨
與磻溪抗所以炎鼎移富春常在望

咏史二首

淮陰本王孫一節亦偶爾如何漂母名千載遂如
此丈夫在酬息耿耿志永矢漢王國士知恩遇誠

莫比所以蒯通言終因倍義止不然楚漢間成敗
未堪擬豈料雲夢遊翻爲絳灌耻功名烈士心過
激則難已空悲長樂室就烹兒女子
賈生命世才能文正年少關心治亂數反來老成
誚失志謫長沙徒爾靈均弔鵬鳥賦淒其忽承宣
室召前席問鬼神蒼生復何告憂時過不平漢文
稱有道上書痛哭言未免近孤傲

白雲歌

我樵山之巔白雲繞我足我旋山之腰白雲在我

腹我於山下結蓬茅白雲依然覆我屋我行雲亦
隨我止雲亦宿我坐雲爲賓我輿雲作僕我家常
寄夫椒陽白雲與我同一鄉我願乘風遊萬里白
雲應許共翱翔

放鶴歌

朝放鶴放鶴山之陽羽毛纔一振寥廓信翱翔晝
放鶴放鶴山之陰凌風倏然起杳渺迥難尋鶴兮
矯矯將誰集不入鷄群爭粟粒擬遶丹爐伴老仙
擬啣芝艸依沙隰鶴兮汝去好歸休莫戀蓬瀛十

二樓子晉升天缺雙翼定教羈汝作驂騑

瘦竹歌

嗟嗟此君何困約蒼皮老骨癯如削分明絕繁腹
空虛拄地撐天強掙着曾被嚴霜幾度虐又遭凍
雪連番劇儘他陰慘迭摧殘勁直稜稜終自若譬
彼西山兩餓夫流風千載振塵污數窮候變人心
死獨挺幽貞一片孤譬彼典午七賢士科頭赤脚
相招呼世法不拘任疎放蕭然物外天爲徒尋常
妖卉君羞昵璀璨琅玕琪樹比不遇中郎能解音

蕪亭埋沒誰收取久交朋好空期許我愛此君偏
契汝朝咏酣兮暮嘯長月來照影翔仙羽

螢

已近秋風裡還飛客館來捲簾吹易入傍檻去仍
迴淡月荒堤暗微霜小徑開本多飄泊意非動逐
臣哀

秋柳

休說青青傍堦橋望來秋氣已先凋西風難比東
風軟倦態全非眠態嬌護子烏巢陰莫覆逐群黃

蝶葉同飄畫眉小婦情偏厚猶憶春初好樣描
吳青惺

惺字睿中號完冲方伯從弟縣諸生

醉後

狂歌縱飲夜如何山寺疎鐘到薜蘿劍術未通羞
語俠酒泉無令豈嫌苛微虫鼓翼秋將晚殘燭飛
花漏轉多生理不謀畊鑿外莫呼牛馬問風波

登觀星臺

萬古荒臺秋色中登臨何限事難窮星辰錯落仍

垂象法物蕭條已半空小苑芙蓉傷牧馬故陵松
栢斷歸鴻風流誰更思王謝惟有平湖晚照紅

十月二十八夜

小雪離家復二旬天涯囊橐阮咸貧飛鴻漸遠三
更夢殘月常隨萬里身寂寞酒杯清夜斲飄零詩
卷暫時親不堪歲暮滄江上日日歸期總未真

喜晴

一庭晴色暖繩床安穩高眠即故鄉未有重裘供
病骨且將濁酒浣愁腸輕雲迴薄鴛鴦瓦宿雨沾

濡薜荔墻休訝江南春信杳老梅根底已含香

晚步

日沉遙浦水冥冥散步平橋酒半醒霜落自深松
桂色山昏莫辨虎龍形人將臘盡增歸思梅欲春
先放萼青隔岸誰家飛玉笛敲敲清怨不堪聽

秋興

十年相顧尚飄蓬寥落登樓見白鴻玉砌風寒吟
蟋蟀銀床雨過響梧桐雲連北極關河在賦就江
南艸木空獨憶柴桑歸去後清樽猶對菊花叢

吳伯尚

伯尚字敬躋號臯賡方伯長子崇禎癸未進士授
中書舍人

曉行望太嶽

輕鑣驅落月望嶽轉林臯樹得秦封古雲憑日觀
高淮徐開地脈遼海接波濤杜老驚人句長吟破
寂寥

題所居

屋破居何陋幽棲性不違親朋疎杖履世事冷荆

扉細雨藤蘿重空厨鳥雀稀百年難可計無淚向
牛衣

湖中作

萬里星源接分流蒼海東孤帆山影裡群雁水穀
中底定推神力交爭厭伯功欲將今古事樽酒問
漁翁

鏡中美人影

玉臺凝艷質掩映出菱花漫惜歡悲肖應嫌語默
遐遠山同倩筆新髻各籠紗幾許相憐意還將繡

蓋遮

望點山

晴光潑灑動清波嶺上梅花近若何深島曲藏茅
舍穩平林遙阻片帆過耕漁事業勞天壤蕉鹿身
心託咏歌歷盡艱辛驚尚在殘山剩水感情多

劍門

孤攀絕頂步蹒跚鳥道烟空恣遠觀翠壁忽分雲
斷影鐵崖並峙月爭寒光凝落照芙蓉冷勢激飛
泉珠玉殘故國荒涼兵燹後不堪遙望起悲酸

秋眺

征雁成群喚碧天
溪明如練向亭懸
幾家村落松雲杪
何代樓臺夕照邊
客久儲糧猜野雀
病餘心力近枯禪
休將涕淚悲生事
牛馬風塵又十年

吳仲正

仲正字敬立方伯次子太學生

立夏小集

今日已稱夏此時還是春
剩紅花戀舊雅綠樹趨
新晴色淨於練香光暖襲人
山家迎送簡鶯語為

留賓

耽眠

出門惟信步隨寓只耽眠
世事干戈裡塵緣塗炭
邊夢爭江子筆囊澁范家錢
日憶田園好平生豈
受憐

題伍子盟頂

歷盡滄桑不記年
山名還藉昔賢傳
臣心可剖盟如日
石骨長撐劍倚天
壯志自完當日事
剛腸寧許後人憐
忠魂不逐鳴夷沒
靜夜深林泣杜鵑

江陵遇寇
城頭日落角聲哀
聞道流氛捲地來
燐火夜生千鬼泣
炊烟村斷幾人回
雲迷故國旌旗冷
江集新營壁壘開
元老壯猷矜獨得
乘風早展濟川才

馬跡

何年留得此奇踪
踏破蒼苔首欲東
在昔不禁悲過隙
到今還自憶追風
雲屯竹塢磯凝白
春到桃花嶺綴紅
駐馬英雄何處問
五湖烟雨滿長空

荆溪長橋

橋伏蛟龍勢
波涵晝夜聲
荆溪千古事
周處僅傳名

雨不絕

春光多向雨中過
不識天心竟若何
二麥將供魚鱉盡
清時能吏日催科

吳渭

渭字清之
性情介絕俗
家貧業攻木
以自食其力
暇時不廢吟咏
崇禎甲申之變
閉門絕粒賦詩
二首堅卧而歿

弔古

首陽埋白骨含悲目未瞑採薇非貪生浩歌吐哀
情叩馬非多言大義麗乾坤高風百世師我心尤
耿耿為君紓長恨商周共泯泯

吳軫

軫字星子號若客伯尚長子少遊粵西因寄籍登
康熙辛丑進士初任安東縣知縣補太平縣知縣
陞德州知州卒于官

獨漉篇

獨漉獨漉水深泥濁寧喪我軫毋飲我犢鬪獸之
困怯于虺蜥讓國之賢見訟乾候家有敝帚享之
千金桐實養臬求其鳳音白龍魚服雖窘何傷犬
被鸚貂目為不祥利劍在掌不成報仇嗟彼舞陽
孰如女休雄雉于飛不顧其雌我欲射雄得雌何
為

雜詩

割肉飼猛虎其勢固易窮結客少年場何如隨賈
農豈不惜牙爪怨毒在其中朝為挾彈遊日暮自

相攻高馬鳴路側一身死垣東亦有千金劍未成
銖兩功但爲觀者笑流傳都市同
束髮夫何爲被服好鄒魯搖落蓬蒿間亮節賤如
土非無堯與舜揖讓竟何補悠悠策馬途獨望已
愁苦鳳飛赤霄上豈亦畏羅罟寂寞人間遊徒然
誦往古

感舊

俎豆移莽泯國章焉足論淫淫百憂集飛騫竟何
門偶影慕宿昔迴薄彌傷煩生平好賦頌傾寫誰

爲援布衣四五人著述累萬言頗合陶謝理迺蹈
胥平寃嶠嶮氣堅樸談兵有淵源須子茂才藝決
昔無平原慷慨未及終流亡已安存返顧壁上辭
宛爾全幽喧恍若風雨夕攘攘油汙樽挑蔬膾鯉
魚飲如鯨鯢奔曲指未十載倏忽毛羽髡修文豈
寂寥于我遺晨昏重違伯桃義竊負豫讓息嗟哉
同學人誰復類虎賁蓁蓁狐域首安用招爾魂願
得傾高柯光儀不可捫徒將百里淚沾洒椅桐根

南磧

南澗久陰雪有廬亦傾頽爲感生平事厭臨歌吹
臺弭棹下清溪凌厲風色哀哀哀日云晚我行猶
水隈春寒野鳧稀地折孤瀾迴喧飀向窮巷柴荆
緣我開有酒不在多聊以靜徘徊感嘆百年內安
能委蒿萊尊前射虎兒可似李廣才躍馬未爲暮
胡爲心似灰

將歸江南哭亡奴墓所

汝骨竟不歸吾悲豈能道相倚萬里途視汝未艸
草何期朝露促歛忽遂終天今晨跨青駒駸駸涉

寒潦低墳埋瘴癘立馬費追討呼叫那復知徘徊
重煩懊人生等秋露生存固難保吾返心迷茫汝
留骨枯槁但恐歲月深此地迹如掃灑泪沾土泥
淒風動禾藁

贈蔣見洲

見洲名溶一雒陽人曾任叅戎聖安朝以
爭童后事忤貴陽落職壬辰秋賣藥長干
與予遇於逆旅君之兄名澄一者先大父
門下士也大父守河南當福籓初建裁抑

諸豪橫不法事至以死力爭雒人得安然
此惟雒人知之雒人能言之蔣君兄弟尤
知之深者故其言甚備予因採家乘合諸
蔣君之語述爲短章雖奉揚先烈亦以見
故人之情也

神廟定儲位賴此綺與黃愛子封雒陽千乘辭朝
陽恩賜古莫比旌旗亞梁王我祖起廷尉再仕司
農郎才名動寮尹一時依末光帝曰汝往哉爲朕
守是方拜命自茲出汲汲修紀綱故事賜田土編

戶供梁梁王欲易衛士盡爲屯牧場雒陽百萬指
旦夕離耕桑我祖力持之激切成短章箋凡四五
上鷗羽不得翔三載去雒城雒人淚如血稚子望
轅啼紅女泣幕側但言我公去生死未可必今已
戰伐餘思慕猶往昔雒陽有蔣君意氣萬人敵相
遇冶城間黯然爲我述反掌四十年細事無所失
彷彿雲龍姿聞者皆嘆息在昔中州陷玉戶滿鋒
鏑誰知四守祠遺棟還突兀蔣君本國士挾策事
戎軒方在聖安世揮霍如平原論事忤貴陽幾欲

墜兵樊不及永嘉難拂衣歸故園今日復來止賣
藥青溪源數見紫髯動輒聞慷慨言我故戒飲酒
今也爲君開君則善飲流臨觴反徘徊區區故人
意豈在同酒盃幸爲良吏後握手向塵埃敢令先
世業零落隨蒿萊日月未遲暮簪筆望雲臺

悼志

丹漆不同素逝波寧復迴高視蓬海間殷憂孰能
開終賈正年少忽從西日頽菑川牧豕翁晚侍柏
梁臺窮達會有時且盡手中杯但逢江夏守莫談

鸚鵡才

歲暮二首

萬兆豈無歸誰能順其候何如鹿裘兒枝撐在田
狩寒風吹黃州一發斃三獸弓矢雖不仁牙角詎
終壽策馬過朱門伐鼓晏清晝秦鞞彈未終竟落
戎馬後

歲暮復多陰獨居良不歡雖挾麒麟蜀不如締綌
安豐屋上雲霄致此或非難所以苦寒士終持滄
海竿椎空子房去圖畫荆軻殘雖然疎劍術亦令

人心寒

靈巖寺夜坐

孤禽亦懷群獨夜誰與適猶有薄雲歸滄洲意不
隔幽幽叢桂側未見淮南客微月度烟霄秋心去
無迹生隨蓬草盡幾對空山夕還喚未眠僧同上
琴臺石

夢爲怨辭

歷蘼蕪兮陰和紛百獸兮騰波接幼媚兮怡悅舒
光明兮若何交輕祛兮恍忽握靈珠兮逶迤將奮

飛兮從汝憂讒言兮孔多

與客談往事有感

日出募旗晝鳴鼓帶甲者誰兕與虎但看數騎向
東來城上無人張一弩啞啞鳥叫女牆邊君王乘
夜上樓船美人鐘簾歸無日百處樓臺生野烟
出車九月七日宿皆樹樓

小樓人未去庭葉晚來多渺渺羊裘客看星意若
何高風傳鼓角微月上雲蘿遠憶京西壘猶然夜
枕戈

感運三首

漢王居蜀促燕將守齊疎棧道過原馬聊城泣鼎
魚已傳諸葛表况射魯連書不識天心在何須問
出車
歷歷雲臺客寥寥石戶農眼隨旌鼓異道與蕨薇
窮望峴空留碣歸朝盡賜弓穀城如肯待猶可問
侯封

劍壘來歸後謳歌屬望專懸車惟一水帶甲又三
年不敢桃笙暖時聞竹箭傳霜前行殿隔未見海

東船

冬日雜感

林屋經年客夢違破寒稀見塞禽歸梅過半壑香
猶淺雲滿重江濕不飛滄碣久傳戎馬競鷹臺應
試谷風微著書未合隆中事何況投閒問釣磯
來鶴樓前壁壘虛當年真似子雲居不聞饋酒尋
元亮惟有登城感闔閭蝦菜船歸空有恨葡萄雨
斷竟無書共傳躍馬傳花地尺五天邊姓氏除
秦篝齊縷莫招魂夢到空山未敢言採藥人亡終

浩渺談天舌，敝誤淵源荒塗。但有狐狸迹，宿艸猶沾雨雪痕。獨對酒榼傷歲月，論交無復紫髯存。

贈介子姑丈

十年處亂推師表，一日幽囚見古人。梁獄至今書未上，秦庭何意血猶新。天迴自辨龍蛇氣，事定還存艸莽身。搖落長干秋雨後，又聞開閣畫麒麟。

旅懷

一旬鄉邑報書稀，獨對平闌孤柳微。落日關心雙艇子，遠山回首半烟霏。比來鳳沼無藏甲，不復龍

沙急戍衣銀塹玉床人，夢斷清江惟有暮鴻飛。

聞信

短劍飄零歷九州，茫茫嬰杵孰爲謀。黃河萬里身孤去，白水千年泪獨流。夢裡雲章曾再見，腰間寶玦有誰收。爲吟走馬金臺句，落木風含四野愁。

蠟梅和人韻

羅浮別種九迴香，逗得春風一縷長。應是色身金粟現，未容描寫上流黃。

吳翼

翼字文祚號自遠伯尚次子

三月三日遊桃花熨斗崖

暮春歸故山新霽愜幽抱袂襖邈難追孤情恣探
討捫蘿入雲峰復下清溪道不見古離宮但見閒
花草花艸常欣欣朱顏惜空老豈知千載後俯仰
中心擣遊覽興不窮曲折向遐島山勢行欲盡風
濤起浩浩危嵯峙水湄竒景若天造寥寥罕人蹤
僻隱漁舟好縱橫指顧間舊蹟誰稽考殘陽遠近
分影落松筠倒杖策還敝廬塵氛悉除掃相期卧

林泉自此謝煩惱

送旦華之江左

古人惜離別慷慨贈微辭况以骨月情當此兵革
時江帆影蕭蕭江水波瀾瀾歲杪復遠征念子多
憂思十載罹家難一身幾貼危曠懷越流俗招毀
固所宜崎嶇山水間役役安足悲孤憤去故鄉空
囊走天涯荆楚覓舊交晨夕行相資豈曰布衣士
落落不見知歎息萬里心寧爲衣食私嗟予長貧
賤獨負匡廬期羨彼孤飛鵠肅肅振羽儀願言乘

清風與子相追隨

遠山蕩遇風

朔風怒號天作雪萬里同雲忽崩裂陣雁披靡落
遠灘黃蘆白荻紛枯折誰云乘船似乘馬挾柁驚
湍轉生劣山色冥冥水色寒邴得神力平狂瀾不
知灩澦瞿塘險處處悲歌行路難四海風波何日
安一泓恬靜魚龍歡

山鼠

山鼠微軀不盈握攀條弄葉喜跳踔淺毫軟骨怯

霜露終夜呼群潛屋角空山幽壑多猿獠足力猥
捷心貪饕行人挾弩未相向已踞絕壁殺悲號可
憐鼯鼠無全技罟密機深難竄避銀絲絡頸性未
馴尚思解脫求其類吁嗟道路網羅深暴殄纖弱
傷天心騶虞神雀多靈性竭海窮山何處尋

客夜

歲晚驚爲客澆愁酒易乾江雲千里暮山雨萬家
寒拂榻驅飢鼠搔頭却敝冠梵鐘何處發歸緒起
無端

懷鐵三貫天

狂歌已無地知己晤良難一飯王孫去千江風月
寒黃金高駿骨白鬃老漁竿久負匡廬約三年夢
未安

送張文顯歸

銀箭樓頭罷鼓鼙送君郊外意悽悽千巖月曉飛
征騎孤店燈殘候曙鷄歸路渺知懸劍閣致書難
似入蠻溪相期不過平原日莫待寒梅花放齊

村舍聞鐘

逐寺鐘聲歇纖纖旅夢生誰云千里隔始動故鄉
情

賦得新詞傳在宮人口

昭陽美女夜鳴絃赤鳳歌殺聲可憐天子風流今
已矣新詞翻盡鷓鴣天

吳夢青

夢青字鳳逸號筠上方伯暘之孫占籍長洲縣爲
諸生讀書五行俱下工古文辭落筆千言不加點
竄所著有畫山堂集

九日登胥山用陶集已酉九日韵

涼風吹我衣霜降今始交殘葉作雨飛仰見萬木凋
登山陟其巔雲淨秋旻高長嘯人不聞清音激空霄
咄嗟行路難奔涉何勞勞志氣百無成但遣髣髴焦
悠然東籬下千載止一陶將攜素心人把酒忘昏朝

題馮西書舍

湖水到溪盡突兀溪上屋畧徧斜向門籬徑繚而
曲草堂讀書處高下蒔花竹柘陰過矮墻曉落半

窻綠人語悄不聞樹頭鳴布穀我來意頗愜掩關
抱羈獨亂書手自繙古硯日頻浴風爐支石畔睡
美茶正熟悠然得清吟懶散無拘束念茲十笏地
容我避塵俗捲簾納湖光歌枕望山麓小隱非世
外幽居安用卜

董二叔魚以小詩寄懷依韵奉答

亭午啟蕉窻撫玩韭花帖尺蹠忽見貽喜色動眉
睫小篆鈐紙尾猩紅印猶濕踈踈三數行遙情百
端集詩句清而幽寒花弄秋蝶狂吟不盡意書遍

芭蕉葉

夜宿田家

村墟烟莽蒼淡月掛枯木籬芭聞犬吠燈火出茅
屋野老情頗真留客致欸曲溪魚斫作膾搗薑煮
初熟濁酒不嫌村香稻美可粥問答惟耕桑不及
世事俗掃地設繩床秧薦軟且燠閉門顧倦僕冒
絮如蝟縮須臾亦就枕頽然展兩足四壁無人殺
風窓夏寒竹

玉川舅氏拙存堂祀少陵先生限浣花二字

勝事成嘉招攜履破習懶入門庭宇淨樹影立如
繖中祀子美子烟霏散緩緩同調八九人秩然奉
圭瓚沉沉下廳簾襪襪跡亦罕摩挲几案間詩瓢
共茗椀清談雜嘲轟相於愜情欸值此澹沲天南
颺弄微暖分曹拚縱飲戶小惜易滿薄醉轉廊腰
苔竹若新浣

在昔創祀事意氣殊紛奢詩句各闢竒往往窮幽
遐今者集斯堂懽娛雜咨嗟聚難散苦易放手同
搏沙得杯湏共持肯負茲歲華吾家寒山邊松門

赴溪斜盡日無人穀山翠當窓透他時薦先生新
藟釀松花湖田鋤早芋崦寺焙秋茶諸君有意乎
稍涼候漁槎

感懷二首

啟戶倚危檻涼宇含夕清風吹隨地葉索落如人
行感時徒傷懷頻年百無成壯志昔何爲僂俛趨
浮名塞座浩文史遮眼若堅城窮亦足自娛捫心
悔前營

故人擁輕肥得意難自忘寒士相追歡強顏氣不

揚如彼江上舟與波爲低昂我懷抱秋月落落澄
孤光靜閱此世俗醒眼恥酒狂行路吁孔艱會須
守一鄉寂寂山中居草木日就荒行行卧田廬釋
志親耕桑
中夜不成寐仰天明星稀涼風吹衣裳霜月穿窓
扉寂寞顧者誰惟影永相依相依不相忤終此無
是非嗟我行事疎動多與心違祇應茅屋下辛苦
抱詩飢清吟托秋蟲草根弄微微

題春江放舟小照

春溪淨無痕楊柳青模糊放船者誰子嗒然欲忘
吾船頭安釣綸船尾掛酒壺注目不在遠心與聞
雲俱我聞高隱流肆志浮東湖談笑輕王侯歌吟
托蒲菰君其買簑笠從之爲釣徒

冬夜讀徐辛齋堅節集用集中送友韵賦贈
窮士逼歲暮壯氣爲之降百憂從中來佈天竦踣
躓朝炊愁濕薪夜照慳明缸飢寒亂胸臆操筆增
惛憊獲示堅節吟讀之內懷懣情話痛刺骨着紙
皆戈鏃薄俗多割砭恥格還淳龐直挾杜籓籬下

此疇能雙今時羞淺陋奚翅曹鄴邦雲翔不敢校
如智摧窮龐從茲風騷壇先生擁麾幢竊怪俗尚
殊夸言一何哢謂當返大雅道若補破椿迺復飾
皮毛愕然具空腔狂瀾肆奔電日下流瑋淙一去
莫可挽迅比舟出瀧欲牽而上之安得百尺篲徒
滋識者哂直戲叅軍椿飛燕誇輕盈玉環妬胥肱
採之空所得悔入山漜漜今讀卷中詩喜逾空谷
楚昔我從事斯如縱一葉艘茫乎不知險而涉彼
大江仰窺天漫漫俯矚波縱縱未許測涯涘矧能

寧蘭泣竭來若有見終愧蜂鑽窗所欠識歸處捫
心嗟莽撞醍醐未灌頂魯酒徒盈缸吾其甘守株
閉門絕奔馳願從導岐路無俾迷歸解

不寐

霜月鋪空階冷艷賽雪色照此不寐人起坐增歎
息一身久漂泊歲月屢見逼悔心棄耰鋤失策事
筆墨初強安蛇足終哂啖鷄肋朝朝耽苦吟詎作
一錢直徒令寸寸腸付與愁百織誓依無始因永
發大願力淬茲智慧劍除彼煩惱賊飄然溷頭陀

托鉢華胥國

短燈檠歌追和韓昌黎韻

短檠短檠夜正長夜霜穿屋寒無光青熒如豆睽
不定紙窻破碎風淒涼起挑殘焰放寸碧照見竹
素羅單床中有低頭讀書客兀坐呶唔悔非策雨
雨風風二十年顏如脫葉凝霜白一杯再拜短檠
前我欲謝汝貪酣眠不然入山聊自恣山月招呼
飲山翠吁嗟短檠吾語汝牆角從今忍捐棄

正月六日舟次京口送九徵赴漁陽官舍即

事賦贈

新正未破春風乍山茶圻苞酒初榨正好風光近
試燈孤裝結束扁舟駕出郭修脩行者稀寒塘拍
拍雁初下幾見溪橋酒旆歌每逢村店梅梢亞僧
鐘纔到呂蒙城爆竹暗驚羈旅夜傍岸雪飄蘆葉
響上燈風逗船窓罅罨腹瓶罌爇濁醪披綿黃雀
燒殘炙肯嫌拉雜減別語共笑拳拳學聊枕藉五更
鷄唱客亦興一抹晴光天更借金翠粧明近水樓
箏琶拍緊臨江榭信美長江南北分起觀雙髻金

焦迓麋眼蓬如貝葉飛靴紋波賽吳綾研見說登
臨意最懽來當送別心仍怕船尾濤殺苦似茶鞭
梢山色甘如蔗歇馬騰空冀北羣搖毫爭長江南
價惟憐見月撥鄉愁還恐看雲憶親舍放手即今
散若星拂皆流光去如射千里征途慷慨行一春
懽處闌珊謝但記籬邊菊可采要待花前殘同瀉
願君毋忘繞朝策蹇驢趁着秋衫跨

月蝕

玉兔撲簸青雲端咄咄何物來爭餐紅殷血色手

可搏火齊倒換琉璃盤官衙逢逢鼓鞞乾萬戶嘈
雜顏無歡大地換眼頓改觀三伏肌粟生陰寒
與掃出舊宮闕姮娥起舞乘白鸞來去絕跡將誰
謾搔首問天天漫漫春秋中漏仲尼筆群儒捩拾
紛天官恨不借我雙羽翰攫身飛上天門看此月
萬古懸疑團

憂旱篇

農夫辛苦何所憊家無糧春望秋斂四月農忙已
插秧水浸及骭泥汗臉高低蔣罷一半功斂錢作

社祈天公五日一風十日雨妻孥惟樂歌年豐今
年旱魃吁太虐赤日炎炎金石鑠偶然片雨頭上
來散入江風幾曾落有河岸水河底乾無水岸田
斂手看黃秧枯死救不得眼中泪滴心頭酸大旱
不過七月半天意何曾許人筭四野秋無一把禾
夜月依然照田畔一百廿日天宇晴田如石堅不
可耕耕牛賤賣買貴米買米喫盡何聊生農家最
是凶年苦闔戶啼飢向誰訴君不見前朝縣帖下
催糧糧不急完吏來捕

饑民歎

今年旱虐吁最烈江北村村無米喫貧民家具值
幾何賣得錢完米難糶初聞是處刮樹皮樹皮味
劣無膏脂縱其有皮亦易盡何以救得蒼生饑朝
來渡江來箇箇風吹肌膚布衫破肌寒腹餒走不
前往往病倒街心卧就中老翁雪盈顛兩眼垂淚
口乞錢自言衰朽罹此厄眼見不日歸黃泉區區
微命何足數無食無兒心更苦一朝餓死在城根
骸骨何年埋故土我聞翁言割中腸仰面太息呼

老蒼安得有米千萬斛按戶計口月給糧昨日傳
言煮官粥粥少人多空逐逐來早欣逢到口嘗來
遲還坐鍋前哭豐年一飯衆亦輕年凶一粥人亦
爭所爭微渺所係大常恐流落填飢坑餓坑有命
知無那且請從天忍寒飢君不見豪家置酒日推
牛笙歌一樣凶年過

牽牛花

溪頭藥圃茸不芟牽牛引蔓花摻摻晨光一暹色
初洗露明如水浮新藍怪汝柔枝太頹放欲倩籬

落相扶挽游行得地轉羈絆到底繚繞成嬌憨下
有秋蟲響逾急似放衆口交譏諷秋深結子供採
掇攬入本艸嗤庸凡稍充下乘備佐使強與世味
分酸醜得依僻野寄幽潔豈有麗質青紅嵌更嗟
顏色易萎落秋日艷艷如刀鏡客來對花莫嘲弄
眼底轆轤誰能劓詩成獨立苦吟望碧雲葉葉飄
秋衫

泛舟漏湖用東坡九日黃樓韻

漏湖好景無人說我上扁舟趁晴發波平沙軟不

生紋淺碧粼粼苔面滑久栖僻地慣疎慵箕踞船
頭脫巾襪偶包芥茗汲清泠瓦鉢塼爐自煎呷兩
岍纔看泥土乾種菜人來攜短鋪水楊風起穀颺
颺點染秋光增肅殺沙灘日落纜漁艇曬網高竿
如列剎蘆花雪白望不到遠浦鳴橈低軋軋欸乃
一散烟淼茫亂鴻幾點寒雲壓捲蓬葉作乾雨飛
林巒戍削秋梢鬢暝烟村落動晚炊野老門前數
鵝鴨天然此景最清絕何似塵寰人語雪

端二日仝人集浣花閣祀少陵先生遂觀競

渡

白雲溪頭水溶溶溪深水澗涼生風旁有三楹浣
花閣蔽以高柳挽青穹舊經此地嘆幽絕欲置尊
酒無由同今來結伴祀杜老正值令節當天中畫
船簫鼓看不足波光鬢影疎簾通可憐沉淵意寃
苦剩與後世誇豪雄閣中雜坐恣吟嘯邀我弔古
嗟才窮獨憶丙年際此日董生作社遮群公大船
撐向柳深處舫船百罰珍珠紅席間分闔體不一
各騁雄怪鏡天工嗟哉董生逝不返使我對此憂

心忡勝事距今已十載星馳電掣何匆匆眼前景
物真可惜遮莫轉盼成虛空酒闌散步大堤去日
落水面烟溟濛

十里泉

出城驅馬過十里半畝傍山泉五泓一泉一景狀
不得下馬獨吟心自清老樹蕭蕭霜葉下荒臺渺
渺夕陽橫可憐地僻無人問誰載茶鐺為此行

雪

妬月色相映迎風影自斜撲窻疑欲碎糝徑淨無

瑕野鳥寒偎樹江梅早着花柴門有人掃誰問姓
袁家

東山梨花數十樹一時盛放

滿林香冉冉數畝白紛紛覆屋驚春雪依山想暮
雲鶴歸渾易失蝶繞較難分何日攜尊酒花前借
一醺

掃墓

千里扶孤櫬湖山寄一隈白雲迷斷嶺黃葉沒荒
苔路遠違時節家貧薄酒杯何年華表鶴還望一

歸來

過古昆陽城

秋艸連天路渺茫搖鞭策馬過昆陽亂鴉殘堞浮
雲黑古木荒祠落日黃憶昔中興饒事業到今陳
迹感滄桑可憐憔悴麻衣客獨弔中原古戰場

南陽村庄

南陽村落結幽栖莽莽中原客思迷冒雨剪蔬雙
不借跨驢沽酒一偏提白楊颯颯寒鴉舞蕎麥茫
茫野雉啼無限傷心何處遣悲涼詩就壁間題

嶧陽官舍春曉

棠梨落盡葉初肥
花事全稀燕正飛
細雨每愁侵客枕
餘寒猶覺戀春衣
連宵酒盞傷心把
千里家園合眼歸
却憶綠蘿湖上路
漲痕應沒釣魚磯

客夜得家書

官衙秋老雨兼風
千里書來蠟炬紅
檢點藥方憐婦病
拋殘文字信吾窮
先人事業堂堂去
壯歲光陰碌碌中
懷抱向人言未得
畫屏無睡漫書空

過常山縣

四野濃陰漫不收
波濤十日始離舟
穿林涉水逢山縣
細雨斜風坐竹兜
茅店數家松磴下
秋城一線樹梢頭
計程恰入常山境
深屋寒燈照獨愁

佛手

秋來擬向上方收
當酒擎看似送鈎
未許天花輕拾得
曾將貝葉一緇不
樹間影撫栖禽背
榻畔香扶醉客頭
見說深閨還好事
笑藏紅袖闔纖柔

天竹

數毬天竹實離離
想像櫻桃乍熟時
霜後壓枝珠

七十二峯

馬蹟山

卷五十三

錯落燭邊分艷火參差石榴裙衩勞相妬玳瑁簾
櫳看更宜歌席偶拈充記拍小名應許喚紅兒
蓮子當時尚記不細嘗風味較誰優層層入骨絲
千縷節節關心眼一週雪腕乍分芳榭月冰肌還
浸野塘秋閒來酒畔重拈起分得玲瓏片片愁

菜花

帝城春色浩無邊各逞芳菲到眼前獨倚江南畦
畔老東風吹過艷陽天

吳彥深

彥深字蒼舒號聖涯翼長子太學生

酬劉木君示別之作

倦翮懷故林征途悵修阻獨立寒松枝嚶嚶念儔
侶儔侶遠方來相對無剩語何必平生交襟期重
古處何意轉燭間翻飛入雲去欲栖無梧桐豈肯
少延竚君去凌高岡予留宿荒渚淒淒傷別情切
切動愁緒相送涉郊原秋風滿禾黍

戊寅元旦雜題

鄉心同草發日日暗中生書信經年斷風塵萬里
 輕有兒嗟失學多女亦關情昨夜馳歸夢蒼茫繞
 澗行

七十二峰足徵集卷五十四

武峰吳定璋友篁菟錄
 胥母邱 覲資宣編訂

葉方標

方標字蒼舒號濂峪鳴一次子廩貢生與兄鷗園
 同學下帷攻苦研精書卷有得便涉筆評隲能發
 古人之所未發文學莊周詩宗李長吉著有深柳
 讀書堂詩鈔濂峪偶存草冰雪篇香草數種及所
 選兩朝國雅蒼舒家本素封其戚之黠者誘之捐

官畜妾園亭骨董樗蒲徵逐破其家遂至貧窘老
死無子其嗣子尤駸九經廿一史諸書鬻殆盡予
嘗過其齋觀其所藏書萬餘卷皆手批丹黃間錯
有閱至三四徧者惜無力致之任其散落他手南
陽讀書之士首推石君閱博次則蒼舒觀兩家藏
書有考訂之功有論議之識原原委委實能用數
十年苦功成其學問非僅以藏弃之富誇人也

咏史

陸生起布衣帷幄不預商西楚非真霸淮陰實假

王從容奏新語為漢開文章調和將相間為漢復
舊疆舌辯下尉陀不齎千金裝置身功名外仕隱
皆翱翔

丙吉居尚書病卧百官謁巧宦陳萬年獨留不偕
輟萬年在所舉數日清華陟吉為漢賢相猶喜受
容悅今昔孤直士權貴未能浹破格待賢豪茲風
久已絕

仲華佐光武三十封通侯及爾裔鄧芝亦從昭烈
遊七十始獲遇拜爵已白頭同為漢功臣祖孫胡

不侔太息風雲會此豈繫人謀咄咄英雄姿窮達
非妄求
炎炎漢祚衰宦豎恣睢皆何進召外兵宮禁皆血
滓冤及無鬚人駢戮若犬彘操卓萌覬覦更互盜
神器群雄日紛爭釀成鼎足勢古人有良箴疽裂
身隨斃

白頭吟

有魚恒比目有鳥不單棲兔絲附喬木得以庇高
枝女子志從壹頭白守中閨不願頭白早只願頭

白齊豈期參與商新故相依違茂陵有好女自炫
顏色竒情以見異遷梗以流波移掩抑遠山翠憔悴芙蓉姿彈琴看鬢影不念當壚時林茂鸞鳳集
河深鯉魚肥單絲不纏綿焉用情義爲

上方山美湯中丞

壬戌

楞迦古名山盼蠻走士女牲牢及酒醴倡優雜歌
舞淫髡朋姦巫嗚嗚學神語東家索繒帛西鄰邀
春糈歡娛究蕭瑟厥膺皇穹怒矯矯大中丞持節
駐江滸水鏡挾城狐火犀照社鼠矧茲土偶物本

如蛩負鉅神智洞愚駭小醜生齟齬毅然投水火
清風動禾黍

宿谿上閣

黛色當門來知是洞庭綠眺此湖中山留我雲外
宿隔溪度流螢隱隱入脩竹

登天闕峰

高秋木葉脫策杖騁遠步睠茲天闕峰南邦作撐
拄憑陵躋日觀幽蒼敵天姥雙闕表牛頭王氣此
焉注振衣登危岡曠覽豁烟霧川原莽蕭條村落

迥回互氣勢實雄大絕不類媚嫵雲海盪心胸冥
默不得語

文殊洞

逶迤盤曲磴得茲稍平行呀然古洞開曷測其深
淺虛牝嘯谷風丁斧劈荒巘石色積黝鏡雲頑不
可銑中坐師利尊螺髻蜂蠆卷林靜禪悅孤鐘傳
佛香善未愜探竒心林黑吠山犬

兜率崖

白雲如禪衣片片向余隋遠江耀素波近嶂列紫

邏樵斤樹剝膚林幽花自妥
噌吰鐘磬聲鞞鞞香
燈課悠悠洞中人面壁九年坐
片偈持苦空閱世
在無我

獻花崖

晨曦散高天策蹇至初地
僧閒掃茅茨鳥悅下深
翠萬壑同一音湍然松濤至

宿西湖

朝向湖中游暮向湖中宿
瞑目烟花交化作一片
綠萬柳飲朝曦西子出新沐
持獻館娃宮翠綃圖

短幅

焦山寺觀周鼎

泛濫江海心登頓力猶劬
波浪怯北礁縈洄紆覽
眺亭午入寺門孤磬穿木杪
敬觀古雲靄扃幕亦
光曜山僧謬恭謹鄭重岐陽兆
大可容三升廣未
踰九醞躓踞蹲茵蠢丹青蝕
蚓竅問不容郢人襲
豈類燕料嘆息石鼓文已自
淪海嶠寶此三代姿
留鎮玉帶約

辛未穀日大雪友人相過飲博戲効韓孟體

呈諸公

穀日宜晴暄疾威播滕六絳綵剪鵝毛霏微布牛
目無聲灑破扉有隙穿老屋僅手拆疥乾樵薪如
濕束銅瓶泣蚓竅石鼎脹豕腹就榻跂欠伸柴門
聞剝啄雄飲吞燕髦攤錢倚秦鹿屢掣裘典驢呼
使雉成犢勝績吽吽嗥衄敵鷁退逐予每有天幸
往往敗而復否泰卜循環天地運翻覆籌行玉女
移漏點金人促坐忘履決踵頻剪跋見燭俄聞晨
雞號側聽酸風颺竈婦憂瓜羹小豎互單複見睨

何時消朝煦映窻幅出門踏踈蹻倚杖愁躑躅簷
溜鳴琮琤宛若奏琴筑

古詩四章貽陸大靈昭

仙人翔雲中當風揚素裾霞漿以爲食明月以爲
榆粲然顧我笑玉齒珂雪如含意前致辭薌澤春
華敷勸予學大道授之鳥跡書寸陰慎所習日月
傷其除

其除歲云暮抗首懷古歡卓犖陸平原矯矯凌雲
翰匣有龍門桐不鼓亦不彈太音既曰希賞心良

獨難孤絃泛清汜聲迸玉指寒揮手再三嘆松風
激危湍

危湍無停波大雅亦唐喪瓦釜競雷鳴淫哇亂精
爽美彼雲龍儀鈞天召竒賞左鼓韶石清右應咸
池響陋巷王佐才爲邦鄭所放而我若爰居駭以
鐘鼓享

鐘鼓樂嘉賓之子機與雲雖曰少壯姿擺脫屐與
裾矯矯荆山質汲汲蘭膏焚冥心義皇理研窮莊
列文寄我冰雪卷讀之香氣氤出入懷袖間終以

張吾軍

送張山人還鄧尉山中

青山萬古宅君到梅花天巖前花幾枝春風搖綠
烟凝睇羌獨立含意山之顛仙人終不見悠悠聞
夜泉

感遇

麒麟產魯鄙獲者曰不祥鴛鴦日戀棧上給三品
糧無以別妍醜何論修與殤生乃爲盜蹠死即謚
首陽

擬唐人梳頭歌

女兒十六新上頭千梳萬梳不肯休纖手已盤雲
數匝猶餘三尺春烟流春烟綠膩慵難起鬢鴉飛
出蟾光裏待得妝成日已斜漫拂瑤徽弄秋水

夢天效李長吉

天門蕩誅高九重手扳日月騎兩龍驪山墓下草
已白王母嶺上桃更紅正欲揮斤凌八極側翅摩
天忽塌翼玻璃敲日火烏聲玉兔不春老蟾泣雲
香雨綠九點烟倒吹桑海變作田哀絲急管真宰

醉坐看翠壑埋神仙

圓圓曲

吳王城上月如銀吳王城下溪水新苧羅村口重
幻出合是西家舊日顰色藝青樓稱第一明眸皓
齒曾無匹霍王小女善撫箏楊氏諸姨能弄笛追
憶當年長樂門相如詞賦賤黃金同輦妬多趙姊
妹楚歌氣盡戚夫人武安貴倖勢炙手憑藉椒風
無不有鳳舸龍舟泛彩漪蘭炊桂饌羅春酒公卿
貴客宴神仙妙選紅粧侍玳筵紫雲姓字宮闈識

一齊回首盼嬋娟
嬋娟本屬教坊女
一身豈足當
人主忽然貂監覓
念奴捉臂登車不得語
百道香車候
夜來君王齋宿集
仙臺紗籠寶炬千枝蠟酒
獻珊瑚萬歲杯
是時關隴多爭戰
君王宵旰撒音膳
怨女齊教催
出宮何心復睹嬋娟面
黃紙宣來放赦回
此身飄泊獨無依
燕樓望斷關盼盼
江南哭殺李師師
阿嬌金屋何曾貯
流寓京邸無伴侶
只恐君王念色衰
蕭郎陌上徒相遇
幽燕老將何沉雄
嘆惜自命居關中
細馬擬馱蟬鬢走
彈章忽

出御史驄
寧知蛾賊翻地軸
鋒鏑流星射黃屋
糝糊寶玦泣
王孫破碎碎
鼎湖悲逐鹿
干戈滿地通風塵
弱質飄零何處尋
邯鄲才人厮養婦
黑山桃李黯傷心
老將誓師興縞素
斬取黃巾報故主
搜牢覓得舊妖嬈
今年殺賊因此故
可憐國破山河改
嘖笑誰看舊人在
翔風飄蕩已難支
綠珠憔悴真無賴
竈上騷除入劍門
錦城玉壘建名藩
攀髯帝子空書葬
異姓真王獨拜恩
醜類肺腸多反覆
白晝風波起平陸
舍人告變掖門西
斲冢夷尸萬鬼

族此時何處問圓圓姑蘓臺上草如烟紅顏青髻
俱泥土空托春心叫杜鵑

南樂舊苑行

金陵昔日誇繁華夾道皆住青樓家鶯鶯燕燕時
相見小小端端盡可誇月華如水沉魚目銅盤子
夜鏘黃竹丁緩薰爐已罷焚周郎金縷猶徵曲就
中鄭妥最風流小彈烏珠帖玉投妥娘善彈百無一失沙氏美
人工較奕喬家小妹能新謳豪華偏數燕臺駿芳
蘭生手柔荑嫩馬湘蘭白鶴經殘繡幕香綠熊簞冷桃

笙襯茗戰琴心有范朱

朱玉耶范雙玉

溫潤蕭娘較不如蟬

髻秀才能舞劔紅顏妹子獨耽書更出嬌嬈巧笑

女教坊別隊精歌舞纏頭那惜五銖錢賭伎平推

十番鼓春花夜月可伶秋烽火江南起暮愁牡丹

賦冷三千字燕子春閒十二樓斷橋野草蒙茸路

即是當年行樂處耕人拾得舊金鈿老嫗偷傳畫

眉譜寇娘紅袖亦啼殘

寇媚

停粧淚落曲欄杆細

馬挾歸沙叱利明駝裝艷上長安公子西園夜聞

雨佳人南國成黃土臺榭都飛瓦礫場陂塘散牧

牛羊侶水田叫噪華林蛙夕陽亭亭空綺霞門前
道路堪羅雀任啄溪頭野枇杷

地震行

戊申

涸灘之歲月宿午旁死魄時悉安堵忽然坤隅若
簸揚自燕及吳越淮楚高岬為谷谷為陵豈但崩
摧及棟礎徧地白毛如蝟生向是耳聞今日睹君
不見山東李家庄濁河流湯湯平地裂開數十丈
一時陷入仆且僵西來鬼馬踏霧走何人招魂呼
國殤

洪水行

庚戌

潮頭夜卷一丈起高田低塍都沒水大魚跳波瘦
蛟舞黿鼉蹒跚鴛鴨喜童謠入市找短舸雨纜直
繫崖上枳流尸撞入前村家家具都隨流沫毀况
聞兵火連荆襄飢人食人如食豕回視屋角號妻
孥呼聲水聲哭聲裏吁嗟河伯胡不仁乃使蛟龍
飽人髓

龍王嫁女詞

錢塘龍君嫁龍女鱗旗魚馬紛無數天吳夜卷海

水高坐擁粉娥纔十五貝宮夫人羅兩行霧泣花
愁細如縷雨工青甲騎羊車馮夷絳綃擊鼉鼓珠
輪彭彭千萬乘瘦蛟倒立啣卮舞紫絲絡項雙黃
熊寄書還向柳郎覓金釵劃破橘井深恐掀古社
作溪浦

行春橋串月歌

吳儂愛踏長橋月長橋橋下月生滅一月散爲千
月光玉塔倒懸差比說塔顛畢卓琉璃輪濁水摩
尼珠照徹月隋雲中不可呼散入澹臺湖畔沒露

冷林昏難久留殘影在天雲似雪

金陵八月十五夜燒香曲

天街夜色鴻聲裡水簟銀牀睡初起樓頭戍鼓報
一更月華滿地涼如水侍女殷勤盪畫裙槩几初
移待彩雲一雙瑤鴨金猊間細擘犀紋沉水薰秋
宵三五今宵滿薇露濺香手屢盥默祈心事人不
知海山結蓋烟成串桂風吹夢星斗稀神官夜過
星離離麝臍龍髓總塵濁獨有心香盟素輝

打冰詞

癸亥

朔月此風吼十日太湖一夜冰三尺骨堅勢厚稜
稜高去楫來舟空嘆息前船賈勇亦莫行後船啣
尾排似織船頭估客秦復陶欲去勢難生羽翼買
醉長年亂舞篙白楛兩點椎難入擊玉鳴珠雖有
聲斷機裂帛曾無迹仰視天地正沉冥霜花草上
如錢積寒光日射增嚴威試一把椎面深墨龍潭
縱有蛟螭蟠輾轉冰車行亦得

紡織謠

吳中諸邑皆工紡織惟山中人不善且弗

習也席舍人文輿憫之催工人教以紡織
之法人稍習焉又以粗惡難售其業終廢
吾悲夫人有禦寒之具而不知自迫于寒
也爲作謠以傷之

男畊田女織布不令無襦復無袴山人解畊不解
織妻子伶仃度朝暮安得種棉如白雲精可作綸
粗作縉若能紡雲作衣着世上應少飢寒人

走狗塘

春堤芳草茸茸淺此地吳王曾走犬破費官厨供

肉糜鬣毛巧作五花剪不獵猛獸但食肉越人肥
死不肯逐棄人用汝亦何爲眼看蘓臺上麋鹿

水夫行

漁陽戍卒多踐更上船下船啣尾行健兒驕悍氣
如虎坐索水夫向官府西家水夫纔新婚墨胥簽
名朝出門豈料身死黃河邊誰爲水夫焚紙錢閨
中少婦猶夜作縫得寒衣待郎著

兩松行贈鳳山僧笠霜

松勢閣雲雲不行撐天雙蓋如生成九漈嶺頭烟

霧氣報國寺前風雨聲鳳山之松頂已禿其旁小
松亦老宿年深蜿蜒化爲龍鱗甲怒張不敢觸君
不見昔日泰岱有五株呼以大夫胡爲乎松義弗
受引長嘯如欲洗耳深山逋惟愛亭亭此兩樹老
僧夜來棲此處明月清風疑爲君持以問松松不
語

湖亭翁園故址

湖亭集賢圃光祿翁君所築也面瞰具區
背負莫釐葑房桂棟互虧蔽于川原早雁

春鶯共唱酬于朝夕主人則燒華燈而度
曲賓從則浮大白以呼盧洵勝甲一山賞
兼四美者也乃河山既改陵谷都非伊人
高閣錦石與瓦礫俱灰文選高樓嘉木與
散樗並盡隋草亭於西蜀豈為玄言破茅
屋于滄浪匪關秋雨嗟乎弔雍門者猶慨
想於田文望九京者亦流連于隨會固如
是乎

名園縹緲若地湧結構絕妙般與僦千夫耶許立
危石百金掉鞅成曲池灑灑川原入鏡閣渺渺雲
霧生山眉玉笙哀怨夜堂雨金鈿委隋春衫垂一
朝肩越落人手東家移置西家基泉壑彌縫傳脂
粉樓臺層疊增肥癡新者豈如故者勝因山架屋
湖作坻眼前滄桑知幾變坐令華屋成荒陂千年
壯觀不復睹今之存者蓋已卑草間翁仲夜相語
平陂往復皆如斯牧人野火燒不盡鬼雀飛出青
棠枝

題陳涉江先生為王玉質畫西華秋色卷

吾生夙有名山意方寸五嶽隆然起開緘示我西
華圖十日摩挲不忍置陳君筆力何雄哉千巖萬
壑參差開車箱日月看吞吐箭括風雲絕往來其
中登者畏孤迥前人見踵後見頂握綆渾似猿猱
躡拾級並愁肢體隕曠望玉女居雲中星冠霞佩
烟濛濛足跌蓮萼若承蓋掩映臉際雙芙蓉詰曲
山畔露招提迷離木末通橋市中條窈窕清渭斜
疑有鷄犬相鳴吠誰能振袂凌空虛瑤草金沙光
有無紅塵不入避詔洞白雲常護仙掌書從此微

茫盡烟霧青山一髮中原路柱史仙翁紫氣來華
陽道士青驢度不見仙人九節杖不見玉井十丈
蓮太白長嘯帝之側昌黎痛哭山之顛始知幽奇
自險絕金天遠賜游人訣試一輕身聳紫烟千秋
萬古填冰雪君圖此卷非等閒良工慘澹愁心顏
十日一山五日水不受促迫成雲巒荆關老筆差
堪擬勿教寒具沾案几他年粗了向平願請辦芒
鞋自隗始

蘭雪堂觀女劇

夜簾靄靄春烟膩銀雲櫛櫛花垂地放出鶯雛不
惜聲滿堂蘭雪交香氣纏頭豈肯吝千金畫袴還
須分兩隊貴妃弟子擅霓裳紫髯參軍舞赤幟粉
郎綠髻好神仙俠客紅顏偏嫵媚如笑如啼半面
難傾城傾國新妝異腰肢無力楊柳眠臉頰嬌羞
海棠睡歌翻檀板過行塵坐處矍瑜落釵翠主人
情重獨留髡飲酣一石無餘漬媿媿情語未曾終
喔喔天雞已早至莫教玉漏盡金壺圖與春宵酬
秘戲安用局促囚山囚豈若狂來醉鄉醉

讀四聲猿劇書後

青藤山人青藤束歲歲藤花蔓空谷騷心賦手莫
與倫老筆荆關看不足獨行踽踽知音稀憔悴悲
吟曲江曲海上視師胡尚書掀髯大笑參帷幄有
時出飲酒家鑪戟門夜啟傳呼速是時天子好神
仙定海寧波表白鹿凌雲詞賦喜同時一日聲名
動黃屋可憐尚書功狗烹山人亦慮蒯通族滿腔
幽憤國士悲那有荆歌同漸筑挑燈夜讀四聲猿
托意悲酸當痛哭斷腸不必待三聲一聲再聽腸

難續安得花奴鼓段師絃發聲誰分絲與肉闐闐
 鼓作漁陽搥裊裊蓮衣禪榻簇木蘭慨慷代從軍
 崇嘏風流變冠服本是英雄失路悲却教兒女啼
 痕漉醴醪不惜漏如年酒盞何妨裘典驕子建傳
 粉蹋鳩槃參軍紫髯舞鸚鵡羅襦衿解薤澤敷留
 髡更剪西窓燭

鄧尉山觀梅

家家太湖綠處處梅花多香到滿城去人爭一日
 過水流皆酒氣鳥啾入春和結伴晚歸後沿堤從

棹歌

早睡

早睡枕不着山家已閉門人稀虎欲出月白雞初
 言修竹閒三徑寒雲荒一園閒聽隔籬杵香稻夜
 春繁

過翠微菴

踏葉响幽徑珊珊綦履平梵魚雲際出松瀑石邊
 生古佛有寒色空山無世情懶殘真解脫煨芋傍
 花鐺

月

待月如遲客更闌始到門深檐風葉亂陰翳露蟲
喧似水踏成路積霜非有痕空堂翳寒燭照我獨
無言

早行句曲道中

廣衢群轍動清淨僕夫醒新月啣沙白征衫讓草
青冰蹄韻寒鐸雞口落殘星策策前途迥低徊數
堠亭

半峰庵坐雨

積雨難昏曉空林煙霧生半峰分破榻孤坐入殘
更山果無人落池蛙得意鳴援琴彈古調流水一
房聲

漁舟

斷續斜陽隊漁舟幾箇連烟炊叢葦內罟晒太湖
邊兒女衣裳薄風波骨肉堅吾思欲買此長伴米
家船

石公山

屐未探天姥遊先問石公雲關千仞削箭筈一痕

通釜白移天上樓臺現水中何能生羽翰直跨玉
梁虹

林屋洞

真宰蒼茫意靈奇莫作猜陰崕入巴蜀深壑起樓
臺或有雲君至曾無日馭來多應秘仙笈不許鶴
書裁

影江閣

樹杪飲夕翠樓頭眺萬青石蹲疑虎踞松怪走龍
形塌壁簷棲鶻搖風塔語鈴推窻江影出孤雁下

殘汀

斷臂崖

萬類獻秋眺荒崖攬攬橫遠峰青削劍奔溜月沈
篆石立天疑闢雲低樹可撐茲遊奇絕處宿向峽
江平

婁水道中

放艇逐波斜溪頭見浣紗浴殘春盡繭採到雨前
茶帆碧迎茗水林香過越花停橈沽野店小犬吠
籬笆

柳上酒家

野宿無魚食鱸鄉浪得名山荒風有力屋破月多情酒壓村槽白霜收市鼓清自憐五畝薄尚未得躬畊

夜宿茸城客樓大風

吹沙驚眼暗落木識風饕亂葉走平地窮簷卷敗茅嘯原奔虎豹空壁出波濤若挈酒人往歌同沛邑高

余塢晚歸

林樾暮烟出花村一暝縫犬聲連細火人影亂深松月化前溪水雲停隔塢峰山僧正歸寺杳靄起疎鐘

飛來峰

靈鷲飛來者蒼然勢不群天支將鍊石山走欲崩雲雨道千層險龍泓一竅分神奇誰可識真宰邈難聞

飲子眉齋待月并憶子文

山月待人久來遲翻可憐遙生嶺外寺漸脫樹頭

烟野濶光無定林空籟易傳孤征燕薊客同照影
娟娟

秋步

危岑挺霜骨溪草淨寒叢一鷗健初下數鷗閒向
空水雲無定碧巖樹忽然紅鼓柁滄波去延緣學
釣翁

漢武

青雀西飛事可哀宣房又報濁流開栽桑島上無
靈藥帶劔陵邊有劫灰袍亂赤霜窺虎齒雪迷青

海怨龍媒人間若可長生住徐市應從弱水迴

廣濟庵水亭

湖隄齒齒齧春沙蘆筍戎戎吐稚芽青畝虹梁橋
八字白迷鷗浦港三义荒林有燒侵殘冢破網無
魚掛落花風雨一天聞喚渡烟波萬頃可浮家

謁天下大師墓

四海流離未有家誰於門外泣龍蛇漢廷枉自誅
晁錯燕將愁聞易趙奢指李景隆三統未能肩日月一
杯猶得葬袈裟從亡贏得孤臣在不種冬青滿樹

繅絲

家家門掩夕陽天
煮蠶穿籬出綠烟
卹緯欲增婺婦淚
緝紵難覓宋人傳
醫瘡剜肉真何補
舊穀新絲劇可憐
聞道六宮敦節儉
天孫錦樣冷雲邊

話到

話到山樓風雨浚
腴田負郭已成塵
米鹽不答妻孥怪
詩句吟傷兒女心
破甑何煩重視孟
沉舟力戰可亾秦
寧知精銳銷磨久
燭武曾嗟不若人

寒食

百五風光到賣餠
雙檐禁尾出郊坰
驕驄滾雪嘶香埒
晴鴿當空掣小鈴
野哭農歌情自別
墻頭陌上眼初經
鄰家來餉桃花粥
踏碎蒼苔一片青

旅思

北斗將闌樓角懸
一痕新月掛愁邊
照人難得此清夜
中酒有時翻不眠
寒氣欲升皆在水
遠鐘過後盡成烟
風光澹蕩偏爲客
擬托家書覓便船

菱湖秋月

社集施佩宜齋中限翁字韻

冰輪湧出馮夷宮微瀾蕩漾菱花紅初圓正愛素
秋潔乍起未離滄海東一氣幻作蔚藍色大地都
浸琉璃中夜半長鯨跳潑刺錦袍疑坐捉月翁

靈巖

霜葉鋪紅古刹高上方鈴鐸韻空冥風蘿卷蓋張
綃翠雲塔浮嵐掛漢青廊靜無人知磔響鐘寒有
佛共僧聽夕陽頗耐興衰事又照巖前積翠屏

秦淮

秦淮曾任莫愁家曲曲朱闌網碧紗燈火炙波潮

欲熱笙歌買夜月將斜王孫惜別官橋柳商女清
謳玉樹花最憶昔年行樂處銀箏金管間琵琶

和友人秋興韻

平楚蒼然入眺迷凭欄幾點暮山齊干戈爭躍寰
中馬風雨聽殘枕上雞俠客有心投塞北深閨無
夢到遼西籌時正是英雄事匣劍如聞龍夜啼

感興

千里烽烟達漢宮天晴旌旆映山紅將軍有樹飄
秋葉公子無衣賦小戎沸耳干戈魚鳥隊關心書

信馬牛風杜陵辛苦夔州日猶望欖槍四海空
 從來財賦重東吳集苑如今已集枯玉壘新添戍
 已尉金穰愁聽癸庚呼晉陽祇見餘三版間左何
 人歌五襦欲向深山逃稅課寧知草木亦荒蕪

古意

夜坐罷裁縫燈下剪刀冷挑盡蕊雙頭照人不成
 寢

團扇詞

愛逐秋風謝愁消明月痕但存君篋裡便是戴君

思

雜興

飢鵲捕露蟬殺之亦已酷雖然啾啾鳴寧知是空

腹

春曉詞

綵杓夜勸長庚醉錦帳春酥海棠睡玉釵纖手不
 自持綠膩無聲枕間墜

虎邱竹枝詞

芳草青青一片香虎邱山下葬真娘遊人日日來

澆酒吹殺秋風不肯黃

虎邱中秋曲

年年此夕鬪歌喉人雜聲喧看月浮待到五更清
吹發落花風定一絲游

江行

峰巒倒影浸江潭玉女明裝十八鬟
怪蒲帆風力飽不留蓬底看青山

葉良楨

良楨字端右天聞少子早夭

健兒行

健兒黃鬚身特瘦說是曾元弓弩手前年朝廷大
出師檢點得從飛騎後西市鞍轡北市鞭號令只
隨大旗走都護一戰定水西金錢掠得軍裝厚肥
酒大肉日相要笑殺腐儒三不朽吁嗟兮兵凶戰
危詎可狃君不見官軍又出蜚狐口

野步

野步橫溪好披襟曳履過寒鴉依古樹
哀雁掠長河隔岸窺漁火臨流聞棹歌
前山青數點不及亂

雲多

嘲梅

索笑問梅花梅花獨不語只恐春風來開時自無

主

七夕

玉梭織盡到清秋縷縷絲絲都是愁天上雙星今

夜渡明河只在樹西頭

葉聯璧

聯璧字仲玉

贈可南上人

掛衲空林久須知物外身禪機如覺悟一筏渡西

津

七十二峰足徵集卷五十五

武峰吳定璋友篁蒐錄
湖沙徐弘績虞若編訂

周建鑣

建鑣字武揚號同齋武山瓦塔人讀書勵志法度
前詰與弟建銘友愛相為師友里黨咸以陳仲弓
王彥方目之有長青集十卷

秋懷次高青邱韻 存二首

風月自泠泠虛窓亦灑灑聞吟靖節詩不作悲秋

者鶴唳聞九舉猿啼在中野行雲水上來木葉蕭蕭下一氣入清商幽懷我能寫

高蟬喧落日長梧覆深井獨坐晚風涼虛齋習禪靜豈無名利場燕山霜月冷秋色澹忘懷閒中任
酩酊

江館

深樹逼江寒幽禽自相語落日在烟蕪孤帆去沙渚天迴泰岱雲風挾瀟湘雨萬事付洪流私心慕巢許

空城雀

野雀飛飛空城秋早落葉隨風嚴霜載道長河歲不熟一望成枯槁弋者正相求心焉怒如擣毛羽漸摧殘飢寒殊未保村墅有黃花鄉曲無楊寶菰米墜秋烟還是江南好

夜夜曲

秋河亘長天明星燦如水不聞烏鵲噪但見流螢駛西風初入戶頓覺新寒起幙下一燈殘杼聲長不已

有所思

曉起理新粧盈盈隔秋水一日幾回看時在雙眸
裡山外有閒雲片片隨風起青天萬里遙行雲去
不止

鴈宕山

勝地不可得名山有顯晦好奇似康樂曾未聞其
概爰及宋祥符異境知所在高峰七十七怪險殊
出類上有十里湖積水常不退下有千年松朝烟
浮紫黛鴻雁度隆冬林垆成靉靄故知永嘉山處

處皆堪愛

龍門閣

巍巍綿谷山仰望雲漠漠下有嘉陵江上有龍門
閣斗立數千尋似將神斧削鐵色古爛斑尺土石
不着長藤絡空際時有風瓣落烟濤雪屋濺點同
飛電落不知皇古初石竅何由鑿俯仰盡高深驚魂
莫能樂

讀指月錄

西方有聖人慈心愍濁世說法五十年真常了一

切我愛碧蓮臺於中求妙諦五戒早聞修六如明
宿契無黨亦無偏不遺而不贅蕩蕩百年身漸覺
臨邊際我命在天樞一絲無所繫富貴不增榮清
貧不加厲但願懺嗔癡并夫生智慧耳不聰管弦
目不明姝麗階砌獲芬芳簞瓢有粗糲來去慎精
詳休使靈臺閉勿生左道家免學傷生藝前者莫
教疎後者還相繼鐵杵作花針皆當身自勵區區
一線功日積毋留滯妙法見恒沙深仁具弘誓苟
有善心生慈航無不濟哀哉有盡年歲月同流逝

惟茲無盡靈後天終不替尺蠖與神龍相去何迢
遞至道莫能名潜然下悲涕

明河篇

秋高銀漢明如練夜長偏照深深院院中思婦感
離情良人一去無由見玉關征戍幾何時聞道天
山猶轉戰鐵甲寒花映早霜那堪歲月如流電太
平天子御戎衣將軍若個稱神箭寂莫幽窻萬里
心衰盡淚痕珠滿串星房机杼軋寒聲月殿梨花
舞嬌倩天上人間一樣愁清宮何用悲紈扇

采蓮曲

鏡花淺蹙湘紋綺佳人緩棹秋烟裡香房的的多
青子多青子漫相攀新月現唱歌還

秋風辭

岳陽城上秋風起黯雲吹盡空山裡園林草木初
變衰浮光倏忽隨流水待將一札寄江南麟鴻中
斷誰堪使熒熒兒女逼飢寒愁懷遠繫天涯子芳
草王孫事已休紅蓮綠水仍虛擬烏鵲橋邊昨夜
秋瑤天斗柄還西指來是何緣今若此滿頭白髮

心如苑淚花飄動何容止吳頭楚尾恨迢迢何況
關山千萬里窮通故是循環理大鵬指日南溟徒
坐待扶搖良有以

劍閔

蜀道當天險山川萬國西荒堆分象馬古棧截虹
蜺峽暗疑龍隱林深有豹啼劍閔雄壯戶不待一
丸泥

光嶽樓遇舊

瀕海開生目排空倚暮闌俯觀殘雪在猶覺早春

寒酒到花生乳詩成墨起瀾清音山水合不作雍
門彈

聞猿

三巴西望沂江行遠客思歸萬里情衰髮有霜先
已脫愁懷如水未能平半竿落日青楓浦一片秋
風白帝城莫怪短襟雙淚漬殘宵啼盡百千聲

登太行山五盤至長平又四盤而至頂

嶺落盤盤逼太清車徒相顧馬長鳴下臨絕壑
無底上倚懸崖勢欲傾雨汗徧揮聲雜逐風塵頻

動影縱橫峰巒望斷青山外千葉蓮花萬朶生

接舍弟武功書

康熙五十三年十一月十二日時在岳陽

時日驚看歲已終衰年孤旅歎飄蓬身臨絕谷心
心怯步上高竿面面空禿髮不煩霜借白凍頤安
得酒為紅層巒忽有雙魚至豈是銀河一派通
雲山滿目恨何之一片歸心入夢遲老去更為兒
女累貧來惟有弟兄知虛將寤寐供衰疾獨取吟
哦作歲時日暮碧天鴻雁盡斷腸無計寫相思

丙申正月初十日過三不管宿黑獺溝

亂山層繞障空虛幽壑深沉萬仞餘
顧我曠遊非虎兕泥他高隱並樵斂
寒林日暮悲風動古徑霜殘落葉疎
列縣共稱三不管荒原無稅不耕鋤

漁父詞

草滿池塘水滿川一竿時掛柳梢烟
杯中飲盡閒風月却有魚蝦當酒錢

家住吳中烟水鄉慣將風月自斟量
晚來移棹隔洲去幾陣蘋花撲鼻香

竹枝詞

長江西來天際頭峽中水勢無安流
郎船似馬快馳騁不道有人樓上愁

蜀江春漲雪初消楚客東歸引画橈
家在漢陽城外住綠楊深處第三橋

周建銘

建銘字武功有放言草十六卷

與客登莫釐峰

山下望山山逼天每思策杖尋其巔
今來乘興踏山路山高真與雲相連
新霜染彩遍巖谷千攢萬

簇爭妖妍峯迴嶺轉更竒絕輕衣捷步如飛仙既
登峻極衆峰亞明湖萬頃山脚邊吳江東下勢浩
渺浮玉遙插微茫邊風帆遠近點波裡黃雲滿野
栖平田寰區頻歲游飢饉東南今喜書有年風淳
景美真樂土興亡之感何有焉夕陽忽忽下西崦
林中萬竈生暮烟我歌爾和盡百觴不妨醉倒同
高眠

花下懷繼昭叔

獨立東風咏暮雲梅花如雪正思君詩傳驛路人

千里香遶山齋夢十分碁局燕居誰敵手酒杯狼
藉悵離群一枝流落難相寄祇向高樓笛裡聞

書懷

三十年來世路難勞勞都作戲場看滌將司馬鑪
邊器拋盡宜僚手裡丸榮辱龜藏千慮息去來蝶
夢五更安幾年浪說知天命心境於今始覺安

席農部樹屏構控鶴亭於翠峰

十年絃管醉揚州勇退歸來控鶴遊縱覽烟霞酬
逸興獨吟松菊副高秋琴隨夜月人如趙笙和天

風世並周莫謂神仙必遐舉但拋名利即丹邱

周沈祿

沈祿初名翰字若水號鱸客僑居青浦之白華港少孤食貧礪志能文章兼精繪事性嗜酒有不可一世之槩弱冠角逐童子場不售耻之慨曰寧為百夫長勝作一書生即入市買弓矢篝燈誦孫吳書竟夕曰得之矣比試補吳庠生嘗館蕪城富室志鬱鬱不得一日主人設盛饌晏貴客命女伎行酒娛賓若水廁席顧曲自浮大白哦錢玉友末座

慣傾拚命酒敝裘曾傍可憐花之句擊節嘆賞旁若無人會貴客有愛伎而加諸膝者若水乃戟手大罵幸此人不解吳語以為僂僂舞態耳既醒內不自安謝去遊京師以友朋力入河南鹿中丞幕中丞固名進士一見有水乳之合以上賓禮之若水亦快得知己胸中塊壘消釋過半不復飛揚跋扈久之中丞予告歸潁州猶授粲課諸孫迨中丞歿而若水有人琴俱亾之痛亦倦遊矣體素羸弱患痰癭肺傷於酒時咯血卒年四十九

淞南寄懷吳孟直

去年與君會華堂香湧初開桂今年與君別渡口
桃花落紅雪今年去年景已殊爾心我心長不滅
相思北望情依依雲山黯淡愁同結噫嘻一在天
之涯一在海之角天涯海角路何長故人顏色應
如昨題詩此夜憶舊遊仰視屋梁月未落

冬暮

雪花時一墮雲隙露微青淡日下高樹寒鴻號遠
汀天心有餘蘊萬象無全形感此歲云暮還愁兩

鬢星

村居

水北閒開迳花南小結廬賤偏思犢背性不耐城
居窻隋禽殘果園分蠹蝕蔬莫嫌生計拙猶勝世
情疎

舟行風雨

風雨何關我惟愁榜不前破篔人似蜩縮項鷺如
拳樹暝邨無路雲封水着天茫茫身外景一葉點
秋烟

感秋

信步不知處肅然生感傷
鷄鳴應村落人語立斜
陽水斂漁磯出藤枯蔬圃荒
清磴催響急九月授
衣忙

新霽

秋雲旋作雨數點散林塘
池面波紋縐亭間客意
涼鶉鳩啼苦竹翡翠立枯楊
添得芙蓉媚娟娟洗
晚粧

春雨偶興

東風如剪雨如絲春到晴和曾幾時
蠟屐蹂香花
筵軟短犁畊綠草田滋鶯聲忽轉新
簧舌山色遙
添淺黛眉多少王孫遊未倦江南何處寄愁思

閒居感懷

林風簷日互遲遲
敝葛輕衫且趁時
用拙為雄未必勝
為雌斗間劍氣人空識
下琴
焦世莫知無限欲
顰還欲笑閉門歌泣杜陵詩
奔走栖栖名利途
人生能得幾歡娛
每嗤宰相成
錢癖還嘆先生為
食驅鶴影夜寒三泖月
葦絲秋

老具區湖不如歸種吳田好春雨犁鋤強自扶
題友人蘆舟小影

一卷殘書一葉艫烟波深處老潛夫蘆花雪色桃
花雨三月萼絲九月鱸興至采蓮浮葑水間來放
鶴出菱湖登壇不羨淮陰子手把綸竿當握符
倦倚篷窗捲釣綸高天明淨自無垠滄桑眼底隨
時幻風月船頭樂我真茶竈筆牀長作伴桃源栗
里結為隣江東自古多遺隱始信蘆中尚有人
歲暮述懷來春將館吳城漫成六首東武山

諸友

湖海優游未辨家羞將身計問年華鄉書不至期
歸雁好事難憑數暮鴉卒歲句多歌雨雪倚閭人
應念天涯無端廿載成何補寧謂毛錐事業差
潦倒明時愧不才敢期圖貌上雲臺琴焦爨下欣
逢蔡劍隱豐城未遇雷寒雪尚思邀臘住暖風蚤
已促梅開他年舊壘依然在留取雕梁待燕回
檢點行囊剩一窩琴書無恙奈愁何貧交共有憐
才淚吾輩其如恨事多蝸角縱橫歸北鄙蟻封都

邑聚南柯烟波江上思鱸客肯戀青衫棄綠簑
金錢擲損卜良緣仍作蓬山萬里看紅葉定情渾
泛泛冰花散恨只漫漫羞云髻與秋娘老不道身
同月姊單欲向桃源問消息烟霞深鎖石橋寒
豪氣年來正未銷此生何路達雲霄雄心敵酒惟
拚醉落魄論才那敢驕誰信文園工作賦且後吳
市學吹簫即今海內知名士昔日頭顱半珥貂
閒情常結故山緣每遇佳時輒向前霜後橘香龍
女廟歲寒松老濮公巔吟邊儔侶來三四杖底烟

雲起萬千回憶勝遊難再得春朝獨上渡湖船

春杪吳門感興

眼看春色去難留狼籍榆錢散不收花作態時風
掩冉燕爭巢處雨綢繆蓴羹供饌諳鄉味香積尋
僧憶舊遊一室坐來渾似繭春絲吐盡只拘囚
吹盡山茶一院風鷓鴣啼斷夕陽鐘白雲陟屺家
何在芳草懷人路不窮南浦潮迴雙鯉杳西河夢
去小樓空不知幾許閑情處悶倚闌干數落紅
蕩漾晴光逼眼來鬱懷于此掃除開便思弄筆有

佳趣更喜作詩具別才薄命凋殘惜紅芍酸心老
大摘青梅重門深掩餘香在蜂蝶紛紛莫浪猜
共擁殘編對揜扉薄寒猶未減重衣覆牆隣樹陰
初密穿巷賣花人漸稀憔悴鼠姑春意老飄零燕
子舊巢非祇愁飛絮難拘束苦被東風不放歸
牖外新桐映碧紗閒情無那遶天涯憂心直似三
眠柳客意還同欲落花正假琴書消暇隙何來冠
蓋動喧譁天池穀雨看看近期與山翁唱采茶
旭日移簾過半墻科頭盥漱立南廊蔽蘭泥露珠

光潤嫩蘚黏花翠鬢香盆水魚游爭活潑紙窻蜂
鬧覓康莊已知無計邀春住牽惹晴絲罨客腸

寓齋秋感

歲序頻看日易西客情秋思轉淒迷林梢響趁風
為力天步高難月作梯老驥爭馳千里足飛鳥仍
借一枝棲翻憐景物真無賴愁說槐黃促馬蹄
茂苑蕭齋對素秋美人遙憶隔滄洲機絲密織情
千縷眉黛空描月半鈎蟋蟀夜寒捐白苧鴛鴦波
冷罷蓮舟佳期轉盼來朝是銀漢迢迢渡女牛

宿丹陽

譙樓更鼓聽初傳
篷底挑燈思惘然
斷雁有聲雲似墨
寒蘆不盡水如烟
僅留寸管營生計
好辦雙眸敵世緣
寄語長風待明發
多情吹上渡江船

望岱

半生擬躡泰山巔
今得欣瞻意肅然
鼇背有鱗多載石
龍頭無角獨擎天
瀆連衆壑盈科水
州散中原九點烟
呼吸倘能通帝座
儒生堪列掌書仙

秋晚寄懷吳友篁

雨線霜針繡短衣
怕寒人已掩雙扉
自憐客意還同雁
歲歲秋來冒冷飛

聽竹

雨後瀟湘起碧濤
非閑雲水響騷騷
龍孫百萬當秋怒
敵住金風作戰鏖

題畫贈吳友篁

憶昔南村把臂時
文壇藝府各爭奇
而今老去都蕭散
我拙還能沒字詩

繪聲寫影君能擅
畫角描頭我豈諳
若把文章通

翰墨水中鹽味可同叅

載菊吟

浮生江海似蘧廬身外吟殘一束書載得霜香伴
歸夢要將佳興配鱸魚

斜塘東去指吳淞漸聽鄉音雜箇儂黃葉渡頭殘
照裡有人歸棹載秋容

七十二峰足徵集卷五十五

七十二峰足徵集卷五十六

武峰吳定璋友篁菟錄

長洲吳勳幼清編訂

馬雲程

雲程字昂霄西山人張士誠據蘓日招之不出

述懷示友

彈指無人會此心且隨麋鹿卧長林淵明籬下青
山老茂叔窓前碧草深半榻清風閒注易一尊濁
酒夜橫琴悠然自可忘身世何用徵書特地臨

馬箎

箎字仲和

遊上真宮

廣福舊琳宮幽深一徑通
砌鋪芳草綠水泛落花
紅露濕栖松鶴天垂飲澗虹
鍊師能愛客陪坐說

參同

題祥符寺

遙憶少年日
祥宮著屐遊
夫椒山外境
笠澤水邊樓
梅雨一旬暝
松風五月秋
何能訪僧去
重汎北

湖舟

馬春

春字景陽

舟次漢陽輓南平趙輔之

楚水湘雲滯客程
旅懷於此重傷情
文星入夜光何在
華月逢秋色自明白
鶴幾時歸北海
青山何處是南平
臨風不盡追思意
愁倚孤篷到五更

同本華良...
 其本...
 舟...
 春...
 春...
 春...

徐偉

偉字朝器號古心東園人幼嗜學不樂仕進品行
 端方布衣終老壽躋八十登臨嘯咏之興不減少
 年著有漫成稿數卷

讀史

避亂居東海就養歸西周遜位遠去國此德諒為
 優叩馬苦強諫高誼摩清秋君臣道既喪食粟誠
 為羞試問首陽山薇菜今生不

周亡六國滅天下歸暴主志士報君仇倡義一擊

始成功三寸間封留志足矣淮陰參夷禍相國下
獄耻惟公獨知幾從遊赤松子

漢獻失君德群雄力角爭人龍隱南陽不求利與
名一朝感三顧君臣魚水情出師表忠節正統得
以明天胡不假年大星殞前營

出岫雲無心倦飛鳥還樹采采菊有華園廬日成
趣不爲五斗粟折腰挫吾志五柳春意多其間足
潛世至今信史中特書晉徵士

對菊

爲愛風霜姿值之庭之與侵晨理苔蕪祇恐伍莽
草春葉密以稠秋叢嫵而好寒風揚汝香嚴霜厲
汝操桃李競春陽肯與較晏蚤嗟哉君子心歲月
坐成老致言肅殺時晚節善自保

電

維茲戊戌年孟夏月在巳草木正長養繞屋綠陰
翳百果實已碩麤麥花放始朔越初八日疾風西
北起迅雷忽奔騰降電澍大雨大者或如拳小者
沙礫比頃刻遍階除深厚盈寸許初陰奪五陽差

以積雪擬牛羊皆鼓栗雞犬凍欲死兒女不解事
覩之反欣喜相呼競相掇爭藏籬隄裏彼嚼齒頰
寒我見毛髮豎兀坐小窓前對之默不語後申直
至戌三時尚未已可憐茅茨居漏濕無乾處夜半
纔少息明發始開霽橘林實已空秧針偃洪水方
長盡摧折條枚總萎靡植物既誅夷吾民亦何恃
一年衣食資一夕竟已矣吁嗟乎蒼生負此養生
計無麥與無禾何以保卒歲廊廟非無人陰陽當
變理災祥果天乎疇能問太史

木梳嘆

嗟彼凌雲材性稟青陽德長者作棟梁短者不棄
擲雖加刀鋸功豈為矯揉質形取偃與俯齒愛平
而密一朝一相見用舍隨所適亂則賴爾理曲則
賴爾直青年與相契至今逾半百爾當銛利時吾
髮正鬢黑今爾齒已鈍嗟我頭已白爾壽固在我
我當為爾惜我壽固在天調攝爾有益順氣祛風
邪仗此疏通力人物兩相保勿使侵邪慝惜無百
年身視爾三嘆息

夢梅曲

湖山青湖水綠湖邊萬卉皆發育杏桃含露將茁
芽楊柳凝烟半曠感耐寒挺挺有喬松掃月修修
多美竹何如湖上幾株梅不入群芳自幽獨月移
疎影寫橫斜絕勝佳人在空谷恍然身與梅魂會
千古師雄夢還續嫣然一笑倚林下雲為衣兮緇
為服談諧霏屑吐清香吟詩不落香奩局一觴一
詠可流連半醉半醒那敢觸良夜迢迢何所有太
虛為室月為燭不須更扣酒家門一枕黃梁夢初

熟枝上翠禽啼曉烟獨步蒼苔揩病目嗚呼茲遇
真絕奇三嘆臨風歌此曲明朝酒醒還復來香雪
紛紛滿林麓

胥口阻風二首

寒氣鬣征裘西風阻客舟故山一水際殘夢五更
頭身世空中葉軋坤波上漚壯懷猶未已呼酒看
吳鉤

信宿胥溪口風濤勢未平千林正搖落萬竅忽爭
鳴旅夢苦難就聞愁何易生年來生計拙桂玉轉

閑情

過淡雲上人山房

重到空王宅山房失皎然未傳金粟影已作玉樓
仙局罷彈碁子瓢虛飲鹿泉寂寥白蓮社誰復可
談禪

秋夕感懷二首

一聲秋鴈到江南燈燼蕭然旅思添金馬石渠寧
強致嘉魚熊掌信難兼寒蛩泣露偏依井涼月流
輝半入簾萬事縈心眠未得坐來殊覺夜慊慊

不將心事寫離憂肯把年光嘆白頭傍砌寒蛩時
泣露迎風枯木自鳴秋故文落落晨星散往事悠
悠逝水流誰唱吳歌當子夜令人自起攬貂裘

遊水月寺

石路登登破蘚斑松陰落落趨溪灣不論佛法周
沙界却羨僧家占好山塵世獨怜忙裡老禪心常
是定時閒殷勤為掃西軒壁珍重題詩記往還

觸目

觸目晴溪緩步行滿湖風浪喜初平一雙白鳥不

飛去無數青山若笑迎鷹隼翱翔雲外翼魚龍游
泳水邊情莫言野渡無人濟尚有漁舟一葉橫

蘆花

兩岬蘆花一色秋月明常伴釣魚舟兒童莫道無
顏色歷盡風波到白頭

徐璋可

璋可字完璞古心之孫郡諸生

登鳳山

欲覽鳳山勝携筇第一峰日光浮紫翠水氣靜魚

龍倚石發長嘯聽濤落萬松采芝思往事閒躡野
樵蹤

寄友

魚書雁信兩茫然越水吳山各一天何日與君重
載酒看花同上木蘭船

徐瑜可

瑜可字完玉完璞胞弟亦諸生

山行

不隨人步履俯視五湖雄綠締松岡鶴襟披大澤

風子身千仞立萬慮一時空遇有樵雲叟滄桑話
不窮

徐玠可

玠可字介于號萍石少具文武才長而遊學京師
占衛籍中天啟丁卯武舉未仕遭鼎革浪游滇黔
楚粵間旅死楚中

輓叔恭姪防守應城挺身殉難一絕

惟汝愚忠不愛生憑將一劍捍孤城莫嗟死後收
無骨贏得千秋烈士名

諸葛洞

勝地名傳盡瘁功率師南伐駐黔中洞門雲布縱
橫勢猶是當年八陣雄
渡瀘五月定南方汗馬嘶風幽壑涼萬里摧鋒來
此地白雲閒煞卧龍岡

夜坐

寂寂簾櫳淡淡風一鈎新月印梧桐莫將往事閒
惆悵十二巫山一夢中

徐志宏

七十二峯

西山

卷五十六

志宏字重遠博學無方天官地理無不通曉性尤喜詩年至八十有六尚吟咏不倦

虞美人花

當年劍血報重瞳化作名花映日紅雌雉負慙人
羸慘虞兮千古笑東風

孤棹

不將孤棹泛滄浪歸繫垂楊夜未央十里清風簟
笠冷半湖明月芰荷香

徐廷珂

廷珂字公玉縣諸生

分賦津里山壽吳餘生

似有秦人避世緣迷津猶復問前川雲開谿曲通
幽境路轉湖湄闕小天幾度野桃迷歲月半林啼
鳥隔春烟山翁迥得陶然味畊鑿何須誌昔年

徐三函

三函字子開號倚農少好讀書長游湘湖間所至
多吟咏查太史聲山云倚農之詩原本淵明闡入
樂天新格俱有真味

中秋雨霽泊青山

連朝風雨今夕收孤蓬夜宿青山頭團團皓魄海
角浮光晃水底如晶毬碧天無瑕清露幽漢江萬
頃寒波流舟人酣睡華胥遊雁聲嘹唳荻花洲堪
惜此際無同儔幸有携來酒似油舉杯對月心悠
悠何必更羨庾公樓

楚人有問洞庭山風景者漫成以答

君問洞庭居結廬近榛樾湖上多清風山間足明
月但看鹿豕遊不聞虎豹窟歲儉無流離堪採蓴

與蕨

君問洞庭居田園樂有餘人烟雜雞犬問答是樵
漁時聽催畊鳥閒繙種樹書不知塵世裏得失意
何如

瀟湘秋懷

薰葭風動雁聲過兩岸丹楓映綠波莫謂旅人頭
易白瀟湘秋思上心多

見雁

木落天寒來北雁幾聲嘹唳荻花洲相呼齊向沙

頭宿不共鳧鷺水上浮

良辰

長日蕭條秋思上心多
驚鷺風颺歸菴幽而萃
長麻如秋秋與長鷺入
驚鷺風颺歸菴幽而萃
長麻如秋秋與長鷺入

神遊

驚鷺風颺歸菴幽而萃
長麻如秋秋與長鷺入
驚鷺風颺歸菴幽而萃
長麻如秋秋與長鷺入

鄧旭

旭字元昭西洞庭綺里人寄籍壽州中順治丁亥
進士歷官翰林院編脩陝西臨洮副使

秋怨詞

梧桐葉落平銀牀玉階露白啼寒螢金鋪閉月博
山冷羅衾重添坐夜長五彩流蕪心共結菱花半
壁窺鵲絕紫驪嘶過水邊樓掩面鮫綃淚成血

戊午秋晚同吳晴岩呂六英年丈家文常諸

孫由石公林屋過包山寺訪妙峰大師及衲

孫白行夜宿山閣賦

萬里霜風晚烟波縱一舸閒心看水穀清夢落松
濤帶甲嗟豺虎啣杯醉蟹螯良朋未易盡切莫戀
春醪

曳杖看秋色天開錦繡屏湖波吞室白山翠滿簷
青蚪蚪迷蒼篆玄纁失禹銘夜深僧梵貝惟有老
龍聽

親友凋零盡靈光歎老僧茶烹六代井齋勸九秋
燈夜迥飄金鐸山高矗玉繩何當藉慧劍一為斬

鐘藤

憑將方外友引上白雲層花散無名樹貝刪有病
經詩瓢傳錦水香鉢飯支矧舍此將焉逝誅茅老
洞庭

宿上方寺時衲孫白行導余遊十八寺之勝
踏盡方州勝具區誰比肩無山不挹水有樹悉叅
天梵宇蒼巒合村墟碧嶂連縱觀縹緲外三島漾
雲烟

過鯉魚山

鯉魚山下泛輕鷗小艇橫磯落釣鈎寄語柯陳賢
子弟放舟潛上閩江樓

鄧秉鉅

秉鉅字介明號西園孝友誠慈鄉黨稱之著有西
園聲草

石公山玩月

石公稱絕勝雄踞五湖間月湧峰頭出雲歸洞口
閒亭高虹落影波濶水明山不盡登臨興深更鼓
棹還

題半樓

羨爾城南客幽居有半樓窓邀靈麓翠簾捲碧湘
流鄉國思偏遠閒情世覺浮遙聞多過後詩賦足
淹留

舟泊江口

恬風霽雨度鍾山清夜江聲到碧灣半世路難誰
見惜一舟月好自相關蕭蕭落木鄉心遠隱隱悲
笳客淚潛因念浪遊成底事惟將年少易衰顏

題王漁庄聽泉圖

知君性愛邱壑幽青山白石長年留飛泉千尺掛
絕壁聲來天漢鳴高秋

長計一休凡世自味閑蕭蕭木樨心空到到悲
計風霖雨更驗山書文云筆從雲霧半世留巖窟

秋寄

蘇一善

一善字服卿西洞庭山人有閒來吟四卷蔣孝廉
赤臣序之

采菊

幽情遺勝事澹懷得妙理東籬日徜徉采采馥盈
指獨對意悠然同看心亦喜刪繁而就簡閒課閒
無比彭澤餘清風千秋疇繼起

秋郊晚眺

秋氣正孤清郊垌可閒步丹楓幽壑肥翠靄遠山

暮淡懷適天遊好景與神遇曳杖轉江準夕波明
野樹

竹下奕

世事多紛變林間一局消石枰依美竹木榻倚虛
棹賭墅還希謝忘機且學陶此中塵慮滌清蔭共
逍遙

和陸二雲膠城旅次懷故山同社韻

移棹膠城訪未能孤吟常似望雲僧曾邀品菊開
三徑屢共尋梅爰一燈到此有懷誰可語相聞懸

榻未畱朋羈愁短髮新生白未必如予鬢雪增

閒居雜興

出處居然夢桃源去不還製冠思漢魏斷髮笑荆
蠻放棹層層水登樓面面山此中真可老塵慮盡
情刑此物東鄰十計苦無贏千楸對對以爲嫌
界寒竹下亦自蕭蕭甲海如冒公無奈良財願不
森森林立古苔痕借色為天綠映門棋局酒尊書
卷外駕迴俗士不聞喧

美人燒燈照海棠

海棠庭砌夜沉沉須惜春宵一刻金人愿伴花花

欲語明燈堪與證香心

足徵集卷五十七
 武峰吳定璋友篁菟錄
 湖沙徐 贊稚章編訂
 葉弘勛
 弘勛字有大郡諸生績學工文有莊子註唐詩選
 平詩法初津儀汐軒稿行世
 江南曲
 橫塘柳暗鴛鴦浴亂擊溪蒲搖菻綠迎波蕩槩水
 花飛賽雪生綃初試衣紅葉娟淨如新盥荷葉漫

七十二峰足徵集卷五十七

武峰吳定璋友篁菟錄

湖沙徐 贊稚章編訂

葉弘勛

弘勛字有大郡諸生績學工文有莊子註唐詩選

平詩法初津儀汐軒稿行世

江南曲

橫塘柳暗鴛鴦浴亂擊溪蒲搖菻綠迎波蕩槩水

花飛賽雪生綃初試衣紅葉娟淨如新盥荷葉漫

天勝帷幔個人舉手低招喚采摘無多愁日旰

補錢塘破陣樂曲

柳郎傳書愬愁恚哭聲喚起千年睡黃金鎖斷截
脆葱丹堦石裂吼生銅火鱗烟鬣灼天紫震霆一
聲聾萬耳鼉驅鱷走如麻亂毒風腥雨失昏旦仇
兵蝟集等跛鱉濁涇沸撓波流血天門獻捷驚紫
薇鎡鐘撞鼓君王歸

補龍女還宮樂曲

流蘇雜組晴霓綵七寶輕輶雲鬣颯波宮歡動萬

陽春桂殿開簾迎玉真萬花簇簇驚紅粧香風蕩
地流輝光涇陽小子真薄福風鬟霧鬢重膏沐珍
珠歸掌翻痛楚燒燕菹鰕搗戎旅柳郎別去各天
涯人間粉黛如泥沙

金閭競渡歌

雷奔海沸闔閭城金鼓散作一天聲競渡年年稱
故事傾城士女難為情文鴛綵鷓魚鱗比蘭澤芬
芳發羅綺南國佳人悉澹粧東吳妖嬈方髻齒磨
來曲子驪珠圓纔拋悲管又哀絃伎呈金盡豈遑

惜隨風吹落知音邊知音一霎魂銷散聽罷無言
但清嘆繁華消寂互為根羽觴飛罷何須筭夜深
雲水空濛濛燈光溪光上下紅歸舟爭進亂無次
眼波簾影遙相通今年靈潦傷二麥街頭斗粟錢
五百吳兒驕慣不知愁且把叵羅逐歌拍

塞下曲

岳家軍令肅范老甲兵多邊塞羞言守朝廷耻議
和射鵬空漠北牧馬避南河已舉平安火元戎醉
綺羅

雨後納涼

漲水沒池沙秋籬落豆花烟深猶罩柳雲濕未成
霞晞髮藤牀冷披襟葛帔斜長空風陣急亂捲百
千鴉

揚州酒貴有歎

小槽紅滴似珍珠傾盡囊錢問有無肺渴豈關先
主禁身寒難入步兵厨高歌恨不移封地熱淚真
當洒舊壚街上醉人須是瑞未知何術釁青蚨
黃成子求婚未遂乃有怨詩次韻寄調

去來雙燕鬱金堂冷落詞場月露光楊柳不將依
白傅蓮花枉遣似張郎徒傳星渡烏兼鵲未見天
風鳳跨皇勞瘁裴航求玉杵藍橋仙信尚茫茫

侍御陸竺庵母舅宦遊兩粵十年乃歸感賦
別來人世海桑遷罄訴愁悰已十年墨綬時艱戎
幕寄繡衣霜冷誦書傳遙思故國黃柑美飽噉蠻
鄉錦荔鮮江左風華方掃地粵南兵燹又漫天未
容草檄銷邊燧但得題詩鬢瘴烟流寓豈堪驚喚
鶴歸裝端為感啼鶻身家不繫同遊子仕宦多忘

似謫仙蓮社每邀元亮醉蘭帷空憶孟光賢憂時
匣撫雌雄劍愛客囊空子母錢花鳥春光清咏徧
蓴鱸秋興素盟堅甘辭匠石留千載擬卜桃源共
一椽喜見巖巖新白髮自慚孑孑舊青瑣琴尊且
樂粉榆里筆札應陪書畫船獨媿小才依大厦支
離難續渭陽篇

葉之廉

之廉字公介性沉靜讀書終日無倦容補郡學生
以攻苦邁羸疾卒

清明日訪陳羽士欽念不遇

鳥語晴偏滑山行雙屐輕
花蹊紛綵色松徑亂濤
聲仙去雲封戶人來鶴問名
憑高一悵望處處紙
烟平

不向酒家問探幽春服輕
雨餘桃欲笑風急鳥藏
聲採藥忘歸路題詩紀姓名
晚來清磬發回首白
雲平

問炬庵上人索蒼雪法師詩集

蒼公說法滿人間萬里滇池
隻履還窻下注經窪

石硯松間趺坐敞雲関何因
不演魚山梵怪底遙
尋雞足山舊日二楞庵在否
暮烟荒塔佇孤顏

雨後看薔薇有感

軟紅無力伴書臺有客相扶
帶笑來欲向花神酌
好句疎狂多媿孟公才

葉兆昌

兆昌字允文太學生負氣尚義
里中有不平事恒
爲直之駟僧悉側目屏息焉

桃花澗贈吳餘生

久住名山許結鄰桃花長滿洞中春不知漢魏為
何代直作羲皇以上人庭下珍禽巢玉樹筵中銀
鱸雜芳尊欣看蓮社相推重洛下耆英步後塵

初秋送客

布帆高颺出湖濱波上輕鷗啄紫蓴到日計君當
七夕看星應憶畫樓人

葉張綏

綏字世南負不羈之才攻苦力學從雲間沈淝溪
先生游遂寄籍為華亭縣諸生實世居紀革里也

康熙己卯以春秋中經魁屢上南宮未捷而文名
藉甚京師貴人爭延致之山中後起習麟經者翕
然宗之

還自包山飲梅源花下

雲房黯將暮谷口方夕陽置酒坐花深樽席盈妙
香欲借天上月花下高燈張醉起舞婆娑倒幘巖
樹傍

宿梅源人家

野棲四無隣梅花繞茅屋夜深醉忘歸揖客花間

宿倦枕眠易安日高夢正熟階下爐烟青烹泉曉
燃竹

山居述懷

采薇北山下林薄蔚迴互中有五色芝亭亭植雲
路靈根濯太和浴日溉清露灌莽敷春榮翳彼琅
玕樹不遇蓬壺人誰為擷之去

羽公贈菊數本植之庭中適御雲見過留飲

唱和

凡草無好姿柔枝挺孤秀橫檻臨秋香眾芳適爭

湊日夕三徑開之子信良覲陶令思酒時太常正

齋候御雲茹素
予亦偶齋一尊羅野菽清致逼襟袖百物有真

味交情淡彌舊嗤彼金石盟雨雲或翻覆而我頗

落落幽蘭得同臭長耻丈夫骨高門事奔走君遊

遠仍困我居狂轉瘦納履不厭穿居室豈知陋浩

蕩天地間意氣獨馳驟攬月梯層崖塞雲陟危岫

際此秋宵良明蟾懸清晝木末萬籟鳴笙竽宛然

奏倚醉一高歌寒空盪群宿

月下與友酌酒

牀頭無黃金解衣換春酒清樽泛瑤階皓月入素
手微言意彌親疑義快共剖涼飈侵薄帷促膝坐
忘久知心世已希良會信非偶百壺傾衷腸愁於
我何有

看梅鷄籠山循丙場而還

層岡四圍合一澗穿平疇花深不知路身在孤山
頭霽景麗初旭萬斛寒香浮林邊兩三家竹戶臨
清流荷鋤值園父指我循廣邱高下縱復橫光怪
搖星眸群坐或孤往曲折窮討搜此中非人世何

處尋瀛洲

高真堂讀橫山叔氏詩文集賦贈

川嶽鼓靈氣翰墨流精英雲房一開卷耳目皆清
明橫山先生天下士卓卓功名策青史彭澤歸來
三十年赤紱朱軒真敞屣閉門終歲耽著書吐屬
直在黃虞初蔚為雲霞炳日星班馬作者供驅除
有時孤吟振寥廓風雨猝至雷霆薄或為清廟明
堂歌百物條暢含熙和豈復斬新闢格律鍛鍊造
化歸洪鑪名山絕業不脛走于先生身亦何有太

湖東畔草堂間日坐春風飲醇酒

秋夜聽琴贈張梧岡

長松獵獵秋風生吹淨吳天孤月明
有客携琴坐松下羽觴未奏先凄清
一彈帝子楚江曲湘水無波到今綠
鼎湖龍去不可期竹上啼痕碎青玉
沙寒露白菰米香鴻飛颯沓來衡陽
呼雛求匹自相語欲隨不墮紛迴翔
繁音促節忽交變目送手揮意彌晏
村童罷牧樵父歸一一溪山靜中見
低徊坐作懷故情請君且息絃上聲
疇昔相逢五茸北

橫雲霽色開林麓君為安絃我賦詩
一酌青州倒千斛彈指流光十載過
元龍豪氣今如何射策金門遭按劍
羊裘風雪歸江湖聽君冰操意瀟灑
萬籟俱寂幽泉瀉珍重蜀桐莫輕下
廣陵散後誰知者

漁隱圖為沈世文題

青山望不極烟水何漫漫手把一竿坐江麓
清澗習習生微寒世途漸識風波惡翻雲覆雨須臾作
如君意氣薄層霄金石匪堅重然諾曠哉人間別

有天晴沙狎入鷗群眠香餌不施任魚躍桐江片
石今依然予懷渺渺望彼羨溯洄從之在中止安
得載酒千斛長相隨醉吸湖光看雲起

烈婦行

烈婦姓施氏名婉貞適金灣吳翰章黃蚤
卒無子其父母皆未葬施苦節自守為立
後舉襄計拮据盡瘁而奪于繼姑積五載
弗獲知己志終莫售也買席地為夫墓臨
視窆歸則設苦褥於寢如殮具蒙被結炕

死時康熙戊寅十二月十三日也先一夕
作絕命詞四章粘之壁遺書白父及翰章
伯母諄諄屬以葬嗣事與成宿志焉

太湖瀕洞吞鴻濛中有高山天削青芙蓉靈氣磅
礴詎終闕有明盛時六七鉅公文采照耀相媲美
如吳少叅施宗銘王守
溪諸先哲皆東山人
數十年來靈氣歌鬚眉齟齬鮮奇

傑遜抗機雲安在哉徒聞婦人女子節烈轟如雷

或甫字而寡或乍蚤而拆剝胸決脰直等閒髡髮

割耳那足惜事詳東山
貞烈傳昔予聞聲相思愴以哀斷碑

殘碣埋沒尋蒿萊表章末由蓄深耻又見延陵有
婦慷慨後容死世本先賢太史家係施宗銘公族鹿車手挽

洗鉛華鳶孤五載忍苟活三喪負土其疇耶百千

荼苦志莫遂片玉深埋復何事絕命詞成歸去來

泉臺相對真無愧吁嗟烈婦一死慷慨兼後容悲

吟凜冽愁寒空湖波倒流山欲裂會見碧血千年

亘白虹

江行

鏡光搖碧江天曉宿雨峯尖青縹緲一篙撐出葦

花深水面驚飛雙白鳥擁衾酌酒熨初寒魚龍卧
穩風波小

曉行秦安道中擬登岱嶽

春風吹客上征鞍得得霜蹄破曉寒野曠星文羅
掌上天低人語在雲端江湖踪跡青山遠京洛才
華碧海寬攬輿便須凌日觀扶桑枝下望長安

早春讀書高峰寺

古寺白雲谷藤蘿一徑偏林疎深見月山靜遠聞
泉有客茶先熟無人榻自懸中宵眠未穩佛火印

青編

夏日寄懷高峰寺諸友

避暑真無計義皇在此中長廊雙樹雨疎竹一池
風世味春冰薄禪心夜月空北窓歌枕卧得句不
求工

林屋看梅至色山寺

雙屨處處躡春風路入花深轉不窮青斷山腰雲
欲起香迷天半日微烘穿林鳥啄飛瓊碎灌圃泉
疏別澗通十載上方身未到蘚牆醉墨記朦朧

閒意

深炷爐香斗室清靜觀物理覺心平事因見晚常
多悔名不嫌低得免爭出岫看雲無故態迴風度
竹有疎聲午慵獨凭南窻几一卷黃庭手自橫

山居

白版雙扉屋數椽斷橋流水入迴澗門無車馬將
迎少身在山林俯仰寬采藥籃携巖雨潤尋花屐
印曉霜寒幽栖擬並巢松鶴懶向雲霄振羽翰

秋日葺城舟次

七十二峯

東山

卷五十七

客路斜陽秋又殘扁舟猶帶蓼花灘波平天影漾
空碧日暮江風吹薄寒未祿漸登勤築圃尊鱸正
美羨投竿此生甘被儒冠誤不為三陽指一彈

雪霽同金元台登微香閣

小閣峩峩香靄間登臨一為破愁顏撐空玉立千
崖樹向暖青留一角山脉脉炊烟村舍寂寥寥犬
吠寺門閒冰壺滌盡人間想十二層城跨鶴還

蒼來携尊金隴看梅

百徧看花興未窮青鞵又踏白雲叢不知人世在

香國無限春光來酒中蒞徑坐迷巖霧暝林墟暹
映夕陽紅溪邊野父勞相訊杯茗熙然上古風

衡門

衡門無事少追尋習氣消來閱世深節省盤餐皆
物力護持庭卉亦天心一編與古成交臂四海何
人是賞音偶出溪頭迷故步白雲看意鎖山林

飲盧鴻緒山館

莓牆低稱野人棲過雨庭莎透軟泥曉枕忘機無
夢蝶夜窻解語有鳴雞酒瓢舊熟青州釀詩課新

徵白社題好事漁莊烟水足一竿坐老莫湖西
君山懷古同金元台吳次程分次壁間韻
牧馬嘶寒野色陰石闌西畔弔斜曛江聲挾海鯨
鯢上山勢兼城壁壘分埋劍孤墳穿兔窟沉沙鐵
戟宿鷗群登臨不復新亭恨一片閒心寄白雲
百戰間關白日低二侯祠廟女牆西山城草木銷
兵氣水國魚龍卧鼓鼙鞭石何時真到海射潮無
力欲平堤蒼涼往事歸樵牧醜酒江天飲怒蜺

關山道中

驛路西馳千疊山連峰中斷啟巖關太平草木烟
塵靜樂土人民歲月閒野寺題詩尋藓墨市橋沽
酒醉醺顏清流昨夜初消雪愛聽溪聲不記還

送蒼臣若淵第後南還

邗江風雪夜舟孤支抵寒威共酒壚千里駿蹄先
日馭一雙健翮下雲衢真令戰鼓無堅陣不愧關
門有棄繻歸路早應登岱岳海天空濶是東吳

秋日海甸登甕山還憇湖上

小山先試登高屐風袖飄然信所之樹色初寒殘

葉墜雲陰漸近遠峰移晴沙雁陣湘江畫秋色蘆
花笠澤詩東望苑墻垂柳下蓬萊咫尺海天思

送友南還

共數歸期指塞鴻征塵已隔薊門東五更客夢鞭
梢月萬樹秋聲馬耳風玉返空山仍在璞劍埋寒
雨未成虹故鄉倘語垂綸者青桂年來道至公

慰別

十九年窺夜雪寒槐花黃過六回看漫因久客思
歸切曾省前時欲到難見慣湖山終在眼別來親

故幸皆安桑弧自是平生願未覺天涯萬里寬

將還江南奉別韓城張夫子兼呈禮闈本房

兩先生

南歸不為近樵漁門閉深深竹石居花落故枝生
意在苔侵行徑俗緣疎細磨舊日將穿硯更讀後
前未睹書舉首長安函丈隔征鞍欲跨故徐徐
天上霓裳不共聞西風驢背倚斜曛心迴止水隨
流水路別青雲向白雲無壁可將知己感有人曾
鑒苦吟文太湖未隔蓬山在咫尺還依鸞鶴群

土屋茅簷郊子城豐碑猶紀問官名雲龍水火都
 消歇留得王正鳳鳥聲
 羊流店訪羊叔子墓
 叔子風流迥絕塵輕裘依約想丰神峴山淚向空
 碑墮古塚斜陽有牧人

春日偶成

腰裏花駝蹴軟塵御溝流水落紅新無端二月京
 華夢開過江梅一度春

液池沉碧柳珍珍禁苑烟深帶曉嵐昨夜落花風
 信急撩人飛絮似江南

碧雲寺故明諸大璫墓在馬極侈麗過之有感

漢家舊寢荒秋色常侍叢祠鎖夕陽悵望虎邱山
 下路五人墓草為誰芳

初八夜塲中偶成

棘垣東畔小池橫月色中分半璧明曲體和衣眠
 自穩微聞仙樂在層城

後湖沙過嶺晤御雲

雲生履底步珊珊七十烟鬟頽眙間踏徧秋林將
日暮因君更過一重山

枕上聞鐘聲

簾捲松風露氣清疎鐘催送一聲聲景陽敲破繁
華夢長與山僧報五更

雪後登費允脩壺閣

小隱壺天一閣寬嵩山千尺俯蒼寒仙翁住慣入
間世絳雪成丹不耐餐

葉汝賢

汝賢字克惟三山人

分賦三山壽吳餘生

倚窻遙望小蓬萊亂石巉巖拍浪開海上三神應
在此不知何處是天台

身世不味阿婆安天台

南漢道皇小聖來屬改靈機財家開輪止三所觀

余知三山書是茶安

此寶壽寺三山人

葉心賢



程